

焦太史編輯國朝獻徵錄

焦太史編輯國朝獻徵錄卷之九十四目錄

陝西

布政使

孟麟

張原明

寧化龍

叅政

陳觀

周軌

平思忠

李岱

陸溥

祝泳

王光祖

于璵

趙雲翔

叅議

李柰

王徽

賀欽

戴恩

盧襄

潘高

按察使

王英

何自學

副使

謝孚

莊觀

劉安

白侃

劉瀚

何景明

王鳳臺

邵蕃

徐聯

唐希介

章袞

劉從學

葛覃

劉效祖

黃卷

梁承學

沈敬原

梁策

盧學禮

石繼芳

薛綸

僉事

林嘉猷

呂益

劉道立

張璣

知府

戴浩

劉昭

郝鑑

曹琬

府同

朱光霽

知州

李英

施文顯

崇廉

吳懋

知縣

孫璽

王命

教諭

殷奎

訓導

蕭岐

徐聰

吳興茅元儀

錢塘徐象樞

焦太史編輯國朝獻徵錄卷之九十四目錄終

獻徵錄

卷之九十四目錄

三

焦太史編輯國朝獻徵錄卷之九十四

陝西

布政使

陝西布政司右布政使孟公麟墓志銘

皇上自興邸入正大寶剗宿弊溥鴻恩起羣英一新
庶理曲阜孟公西野以福建右參政家居奉詔復陝
西右布政使公感激疏言二十事曰端聖學任輔臣
勗大臣選諫員信詔令順時序隆儉德遵律條省工
役黜貪殘崇褒賜敦師儒重撫按慎守令悉細微飭
清節詰兵戎久將令儲倉庾禦盜賊明達剴切多見

採行衆於是知公之可用者未盡而又冀公之復用也。未幾公竟以疾終於家。嗚呼惜哉。或公諱麟字瑞魯。別號西野。姓孟氏。其先自楊州徙曲阜。塋於臧氏因姓焉。至公弟司寇公始復其姓。曾祖諱貞。考諱紀。儒學訓導。學者稱樂山先生。以公貴。屢贈工部主事員外郎。妣李氏。贈安人。加宜人。後以司寇考。洎祖母皆贈通議大夫。都察院右副都御史。妣洎祖母楊氏皆贈淑人。公方姪樂山。公得奇夢。有金梁玉柱之語。彌月。公與司寇公同薨。以生資凝重。性開爽。早克自樹。爲文辭。下筆滾滾。見者奇之。癸卯領鄉薦。甲辰登進士。

第授工部都水司主事監稅餘杭衆議廉平轉營繕
司員外郎又陞郎中督修益王府第計公費同事者
斂手受成歸視司事規畫有方貪商猾匠計無所逞
丁內艱服闋改都水司提督南直隸水利六事於凡
侵河防占官湖者痛懲以法勢家不便陰爲之媒孽
改虞衡司在部凡若干年始終一節兩膺勅命由承
德郎晉奉直大夫以資望擢山西右叅政兢兢効職
再擢陝西右布政使以前任勘鹽事左遷浙江按察
副使轉福建右叅政巡屬督迪頑者爲梗囂者和之
故公致其事以歸公居官清慎委身許國第以方直

忤時未究於用家居孝友耽經史所著述平淡有理
趣推以教人多成就者

布政張原明傳

朱陸樺

張原明字孟復饒封人也正德六年進士授刑部主事歷陞郎中清嚴明慎江彬錢寧嘗以事謁原明悉峻卻彬寧銜之十四年 毅皇南巡衆情洶洶懼變於是原明與郎中陸俸等合疏入諫意指近倖盡惑上怒罰跽門五日杖三十奪俸六月及彬寧事敗原明補四川按察副使今 上嗣位旌其忠原明特加正三品俸尋陞甘肅行太僕卿布衣張紳獻書闕下言原明卒時董玘輩宜屬以軍國大事不報後數年原明累遷陝西左布政使以疾乞休詔進光祿寺

卿孫國舉進士嘗尹高平有卓異之躍擢禮科給事中累遷吏科左給事中所上數十疏皆切中時弊雖批鱗弗計也

陝西布政使司左布政使甯公化龍墓志銘

余繼登

甯公諱化龍字文明號雲田保定新安人祖志本父節俱以公貴贈封中大夫山西布政使司右叅政祖母麗張母吳俱淑人公生五歲始能言比就外傳一意問學十一能文十四補弟子員十八廩於庠萬曆丙子舉於鄉丁丑第進士戊寅授中書舍人已卯册封周藩辛巳以考最封其兩尊人壬午陞工部都水司員外郎視慈寧宮養心殿諸工程夙夜勤事有尚方膳醴之賜旋以大慶恩加封其尊人如其官甲申

督理京城街道卽以其年榷稅荊州公至荆主在禁
奸節費通商惠民比得代課無溢額案無私裝荆之
人士爲詩歌以頌之丁亥督修胡良巨馬二橋日與
中貴人處調停節縮不激不隨工竣賜白金文綺晉
虞衡司郎中加俸一級公主虞衡一切規畫曆注誠
心爲質爲大司空所倚辦聲稱藉甚巳丑陞山西按
察司副使備兵赤城赤城密邇虜巢青把都安兎諸
酋環其外而史車二夷處其內爲邊陲重地公爲明
約束嚴號令懲偷惰之習清虛耗之蠹凡所經理悉
綢繆大計謂龍門虜衝獨石隔遠裨將一人難於兼

制白於部使者增叅將一人分守其地庚寅史車二
夷逸出塞議者紛紛遂至易置諸將吏乃移公潼關
公無幾微見詞色卽候代猶日督將士嚴兵保境若
寇至者未幾史酋率所部寇龍門公督游擊杭大才
與戰於唐子衝擒酋女所捕虜斬獲甚衆詳見督撫
疏中公旣至潼關念關地據黃河上游控制三省秦
之襟喉急以暇日塹土堙谷練兵積餉關若益雄而
盜賊屏息壬辰陞山西布政司右參政理屯糧覈逋
負滿三載陞陝西按察使適當計吏其焚否一裁以
至公至盟於神誓不欲以愛憎爲毀譽戊戌陞山西

右布政使已亥陞陝西左布政使以便歸省抵家而
疾作遂卒時已亥閏四月也距生嘉靖己酉得年五
十有一耳公小心周慎所至以精勤舉職別歷藩臬
不越秦晉熟知其民風吏弊邊事虜情使其不殆卽
當秉中丞之節以大造於彼民也而公不逮矣惜哉

陝西布政司右叅政陳公觀傳略

陳觀字廷賓洪武中應明經少負雋才通經史百家學善屬文遭元季亂韜迹丘樊不干仕進自號菖峯畊隱子與鄉人方時舉郭惟貞族人本初等二十二
人作真率會會必選勝而游分韵而賦兼申之規言以道義相切劘有壺山文會集行於世明興詔郡國舉遺佚觀應經明行修科辟本府儒學訓導觀素以文行爲鄉里所推及補郡校官抗顏師席諸生翕然宗之多所成就閱四歲有應詔薦觀文學者卽被召命至京師朝謁觀跽衆人中獨頎然首出而貌復舊

高皇帝顧問曰彼頌而哲者何人也觀出對上
試以王猛捫鬚論稱旨不數月擢陝西布政司右參
政觀在陝歲餘奉公憂職以廉謹稱一日上忽馳
符徵之時非輯瑞之期而赴召入覲縉紳榮焉及陛
見上諭旨曰爾可侍吾左右觀頓首謝於是日與
宋學士濂等侍上備顧問至晡廼休出勅大官再
賜食觀既過天顏上益察其恭誠嘗面命撰鍾山
賦應制立就上嘉之於是有意大用觀矣無何聞
祖母喪奔歸賜之鏹幣益異數云服除赴闕未及改
拜以疾卒年四十有九觀起自卑僚特承簡注衆莫

不佇其顯庸而觀乃卽世士論惜之觀持身守官動
皆不苟而於清白一節尤其所長見孫或從容問陝
產金其鑛何狀觀驚曰吾待罪藩寮幸不挂吏議足
矣何金之問耶故其卒也妻子困甚子熊以貢入國
學領永樂乙酉應天鄉薦上春官卒

陝西布政司左叅政周公琮墓碑 楊溥

監察御史周軌狀其先大夫叅政公之事行泣拜余
曰先考歿於王事葬既有年而墓石迄今未有銘不
肖孤竊聞先考嘗得識先生敢以請余固嘗愍叅政
公之歿復愍軌之情乃敘而銘之公諱琮字仲方世
家鄂之崇陽大父諱均叔元宜春山長父諱德先以
業儒世家母李氏父幼警敏稍長游學邑庠篤志進
修遂陞太學居上舍洪武癸酉擢試刑部郎中尋真
拜階奉議大夫戊寅遷浙江布政司左叅政居三載
以母憂去官永樂初調河南未幾調陝西己丑冬奉

命偕戶部侍郎左獻摠軍餉於邊事竣還遇寇與敵
死之寔永樂庚寅三月廿五日也時年四十有八公
爲人端重諒直當官處事以義爲制不以利害動其
中故所至有爲自諸生起贊邦憲推謙詳慎多所平
反人以爲難及爲參政三任皆名藩而陝西尤爲重
地公治七年所部吏民咸便之及以軍興出督餉事
決策前進不憚艱險期以大丈夫功業自効而不幸
以死嗚呼惜哉軫亦清慎有父風自太學生擢令歸
安用知者薦徵入爲御史

參政平思忠傳

平思忠吳江人初爲縣小吏永樂中被薦授禮部主客司主事進郎中時文皇方事招懷主客務方殷思忠有精力事皆立辦尚書呂震特器之俄以事下獄北虜入貢他任主客者皆不稱旨震因以思忠爲言卽日赦復其官時以給事中楊弘爲陝西布政欲使清強有力者伺察之遂拜思忠陝西參政未幾爲人所誣謫戍北邊會有詔市馬西域以思忠嘗官主客多識賈胡詔釋其戍給冠帶隨太監劉馬兒使吐藩詣國而還後卒於家初郡守况鍾官主客與思忠有

交承之分至是數延見思忠執禮甚恭且令二子給
侍曰非無僕隸欲使兒輩知公爲吾故人耳其見敬
如此然思忠居貧自守未嘗以事干鍾人尤多之

陝西布政使司右參政李公岱墓志銘

王雲鳳

正德庚午冬余謝病歸山樂平李公來會告予以勅
將琮事曰琮狼黠人也初守備南京欲陷縉紳不測
之禍以立威颺縷瑣細誣訐臺諫數十人請以去勢
益張又連訐諸司官俛首就逮冤鬱不伸念余幸蒙
恩爲言官不可坐視然人方縮閔莫敢誦言攻之異
時一二雉儒敢言之上皆以時不可爲解一日余騎
馬出門墨墨獨行忽遇郭御史者告之故郭欣然同
議乃歸疏琮大罪數事合同官上之琮遂下獄以死

公爲言官所論列關於朝廷政治之大者雖多惟
琮則當其寵幸初隆之日尤爲人所難余別去數年
而公病又數月而訃其子天衢以教諭沈盤狀請銘
乃逸其事公之告我有以也夫按狀樂平之李先世
居平定五代祖諱磨自平定來生五子次子諱從善
公之高祖也曾祖諱季忠考諱寧皆稱長者而祖尤
爲人所信服年九十以壽遇詔冠帶考以公貴封南
京刑科給事中進封南京光祿寺少卿妣劉氏封孺
人進封宜人公諱岱字宗岳生而穎異長能文魁其
儕輩家貧嘗躬枵日以養親夜雨敗鄰人之垣若有

藏物家人欲取焉公聞而止之翌日其家始覺得錢
數斛邑人有受金縱盜而情可原者縣令與其人有
仇欲致之死翟清者被怨家誣告魘魅死罪公皆營
辯得出登成化丁未進士弘治二年拜南京刑科給
事中有直聲上言檢身求言敬大臣謹天戒諸事多
見采納尚書鄭時不職內官張延縱恣殺人都御史
秦公紘爲安遠侯柳景誣奏公倡諸臺諫言之秦竟
得白時罷去廷寘於法又言前戚寧伯王璉不當負
緣起用公內劾弗襍謙抑簡靜爲言官數年不形矜
色至有檢覈勘問之事人必稱平十年遷南京光祿

寺少卿每歲上供天鵝鹿脂皆以樊籠生致於洞庭
嶺海五六千里之外民病之既而或不堪充庖公於
太宰倪公因災異陳言及之止徵其直上供法醞每
歲酒人綱送用舟八十餘艘役夫爲奸且不時至公
悉之籍使有統紀弊遂絕又爲籍以稽錢物出納增
糧以蘇庖人之困而餘子前爲光祿者率以暇逸自
諉公每日事事諸廢皆興見者改觀正德三年考績
至京時劉瑾用事大肆饕虐公卿而下鮮不以賂通
多至數千金少亦數百金公無所餽或曰君禍至矣
公曰命也奈何竟出爲陳州守居無何吏部薦公爲

太僕少卿瑾識其名乃令致仕公不成而喜於是士大夫歎公有守云瑾誅公當內遷乃外補陝西布政司右參政未行丁父憂卒年六十有八

陝西布政司左參政陸公溥墓表 邵銳

予同年友錢塘平野陸公以江西左叅議擢陝西左
參政行至靈寶而卒爲嘉靖戊子五月也年才四十
有五平野爲人冲淡雅素退然書生也至論大事決
大疑慷慨激烈屹如泰山喬嶽使天假之年其豐功
偉績當與古大臣齊驅並駕而僅止此悲夫歲甲午
予以僕臣歸農乃平野墓木已拱宿草斯零矣悲夫
悲夫雖然當 毅皇帝時寘錡謀不軌逆瑾內應齊
魯趙魏賊從中起天下蓋岌岌矣公筮仕職方相大
司馬運籌決策動中機宜大司馬不能一時舍公羣

兇竟以次授首易危爲安公蓋養之素矣豈尋常微
幸機會者耶旣而 大駕將南征公與同省諸郎伏
闕諫止廷杖幾斃予家居得邸報爲欷歔久之今想
懷其意氣猶恍然在予目也公可謂不死矣予又何
悲公諱溥字元博別號平野丁卯舉於鄉明年戊辰
成進士授兵部職方司主事壬申考績封母胡妻吳
皆安人乙亥丁內艱戊寅起復補武選司員外郎已
卯進武庫司郎中尋改武選辛巳考績封父清河令
如其官贈母封妻皆宜人出爲江西左參議 今上
改元詔獎先朝諍臣加俸一級甲申例賜封君服如

子丁亥假事歸省戊子改官陝西二子相勸以子綬
公未行乞表其阡嗟乎公世系里居與敷歷政績之
顯著大參公志之詳也予可以無及特表其大都足
信於後世者如此夫士平居放言高論奮迅激昂古
今不少讓假令與公較似不及至臨事變若彼者則
已厭畏若行露矣疾風勁草不其然乎與公同杖者
江翰林暉仁和人可謂杭之二難云

陝西布政使司左叅政祝君詠墓志銘

羅洪先

嘉靖己丑進士中有頎然偉丈夫豐頤環睛而美鬚
舉辭遲訥不問可知爲剛正恢弘人者衡陽嶠嶮祝
君也余少時喜與同年談學君嘗師事湛甘泉先生
向余無支語慨然若有餘思心竊奇之以爲他日磊
磊縉紳間必是人也是年授戶科給事中壬辰轉兵
科給事中在言路七年竟以方鯁忤時倖臣請內府
曰糧代俸戶部許之君疏不可擅損上供竟廢閣癸
巳星變有巡撫黨執政者故指事應爲解君應詔力

破其奸其辭曰瑞因德應變緣政起古之明訓也某
本市井無賴輔臣汲引驟至顯融不知圖報敢以瞽
史飾辭熒惑聖聽罪在不赦執政懼面詰曰子何獨
無舊情君拱手曰某不敢以門生私先生負天下執
政心銜之無所泄會甘肅諸夷入貢誣訐撫鎮大臣
聽之懼損威涕之懼激禍朝議不能決乃命公同大
理少卿蔡君某往驗將陰中之比驗覆君以所訐坐
諸夷羣小不復株連事尋解執政計沮而君出入邊
境目擊險易虛實之故數數論劄如燒河套復屯田
諸議又爲當事所忌乃乘其未返諷吏部出爲太平

知府三載骯髒視昔不變巡按子貨馬虐民且挾有司爲利君怒將執之而巡按又惡其直已嫁不根語劾君事下巡撫君兩疏其寃竟得理仍左遷兩淮鹽運司同知未幾補贛州知府贛境多盜督府憲司蒞之憲司嘗令賞捕盜者君訶其賊不實乃屏人謂曰吾知某非盜若奈何枉之曠日視捕者捕者搶首不能對具吐實立反其獄憲司不勝忿與巡按共擠君君再引疾求去上不聽尋陞四川按察副使備兵松潘是時西南夷騷動君乃兼程往視出烏道徧歷林峒撫視籌畫條其病利與巡撫王公大用意合二

年松潘無事擢陝西布政司左參政而疾漸作無何
罷歸是時上風尚通君所持乃直信已意不少貶其
齟齬無足怪也君雖屢挫然屹屹民事惟恐一日蠹
食在戶科嘗論賦斂里甲數事行之民間衡卒輪戍
廣西邊衛多瘴疔追逋日密公私兩困君疏罷之全
活甚衆初至太平禱雨雨至蝗不爲災減贛郡供應
卽督府憲司無所避至今贛人德之自罷歸卽居岵
嶠不復往來城市城市人亦不知有岵嶠關說僞禮
不至庭戶嘗與余爲衡山盟間數歲必遣人問訊今
年復書不再月而君逝矣君名詠字鳴盛其先郴州

桂陽人遠祖仲原始居衡陽高祖灝曾祖鑑祖鳳音
皆不仕父壽華號樵木翁以公貴贈徵仕郎戶科給
事中所遺有兩科奏疏使西漫興蜀中稿祝氏家譜
并祭禮式存於家

陝西布政使司右參政王公光祖銘

于慎行

公諱光祖字子孝大名魏縣人也其上世出晉黎城五世祖鳳穩遷於魏之方里鎮鳳穩生資資生玘玘生文皆隱不仕文生贈御史公璠璠娶於申生二丈夫子公其長也申封太孺人公生有殊質遊諸生間經行甚著嘉靖癸卯舉京兆省試其明年甲辰第進士授夏津知縣以外艱去服除補陽信其治兩邑皆以行能殊絕課最東省遂召爲監察御史兩邑之民思之皆尸祝焉公旣爲御史巡視都城以法繩貴彊

不少假貸大將軍驚憚之謹飭門下毋犯御史出按
遼左虜嘗一入塞將吏受公指畫多所斬獲而以遼
帥某不奉法上書劾其罪狀帥遂誅死故相嵩庇帥
而心嫌公則遷公汝寧知府會吳中有烏寇簡二千
石才者往則調公守蘇州未至而寇去吳轉掠江淮
以北則調公守登州公歷兩郡所在惠政流聞士民
德之如其邑吏久之乃擢爲湖廣按察副使備兵辰
沅再擢陝西右參政分守涼州兩居塞徼威聲遠暢
蠻夷懷服是時公資望益重稍遷卽至開府頗以母
太孺人老家居不能從日夜念之數有歸志亦會爲

忌者所中遂自免也公天性孝友內行淳和居官所
餘俸入多推以與弟光考不問其出入口以歡太孺
人其瞻施宗黨族有義田里有義塾有倉以賑有域
以藏魏人頌之初公姊子鄭柱史與行同吉士口公
平生甚悉至是以承烈求銘迹公素所蘊積有長者
風乃其所居官彈劾不避城社身可摧抑而志不可
撓烈丈夫也異日者邊事敝甚其故在刺察之臣與
守吏比而謾上飭餉爲功遁誅得賞令上不聞善敗
如公之刺遼帥安得有謾上者卽邊事安從敝也

陝西布政使司右參政于公瑱墓志銘

于慎行

子冲姓于氏名瑱字子允後更名達真因字子冲其
先文登人也徙家歷城爲邑右族幾傳至太公溥太
公居故溫厚而以倜儻好遊稍減其產娶秦夫人舉
壯子前死以史夫人造室最晚乃得子冲子冲年十
二三時魁梧豐下矩步方裾狀如耆宿資質殊絕目
所暫覽無不覆記爲博士文業名伏一時嘉靖己未
故大司空朱公開府東省爲郎君可大除舍求諸生
年相若者與同研席學使孝豐吳公曰吾有兩于生

昔國士也請置館下而子冲及予從府中執業矣其
時可大年十一歲子冲長二歲予又長子冲二歲皆
以總角操函伊吾應和輒能上下千古劾及百家交
相得也居三年而別予舉南宮子冲可大復遊任城
邸第文聲交進相擊揖大河登雲龍山上忼慨悲歌
而予方卒業詞館得子冲所爲歌詩恍然自失謝不
及遠矣蓋是時子冲已從其邑李滄溟先生遊李先
生於當世士少所許可獨進子冲與語若將以不朽
托之而一時名家如王長公輩亦從李先生所識子
冲而奇焉子冲雖爲諸生名已噪海內而予乃始操

軀學爲聲病宜其遠也子冲旣以萬曆癸酉舉東省
都試明年竣試禮部以太公病馳歸捷至而太公瞑
後三年丁丑乃與可大同對廷試彼時可大聲名亦
燁然公卿間矣會有詔選吉士衆謂二君者卽不事
射覆可知也然皆不被選而子冲與同時名士沈箕
仲屠長卿輩相倡和爲歌詩名滿闕下卽沈屠諸君
子亦無不避席揖子冲者子冲以射策高等選爲澤
州知州澤州河東支郡不隸大府而得自治其屬如
大府二千石職也子冲自諸生時浮湛間里習知民
事一旦試爲郡精核文法洞察情僞所興建便宜釐

華弊竇皆老吏所不能爲戚惠流通上下懷服治行
爲第一居五年召入爲兵部員外郎會上相閱山陵
行出倉猝主者慮不能辦以子冲材任煩劇拜爲山
西僉事備兵昌平入曹未滿歲出爲方面故事未有
也昌平陵下小鎮戍士不滿數千二三奉邑故皆赤
壤無可供億車駕三歲中四出千乘萬騎紛屯原野
而子冲無困苦色予時從在豹尾中每過子冲卽卮
酒從容達夜終不聞吏士前白事也而馳道鉤陳掃
除供張從官羣臣卽次如歸無不出子冲所者其能
以整暇任重如此時羽林七校及漁陽上谷中山將

士夾道爲營惟子冲所練毅騎錦韞棋劍旌旆悠悠
甲於諸營從官咸指目問之交稱兵使者材也子冲
善董將軍董將軍者名一元兄弟更爲大將精騎射
有才畧而子冲亦能馳駿馬挽強命中居閑輒相與
畫地爲營壘羣材官健兒角射殿最賞罰以爲常或
共獵平原血懸糜兔熾火草間酌大白而啖之歌而
相樂也諸材官健兒亦皆相習以射爲戲不數年昌
平得教士數千有古幽并年少風矣大司馬知子冲
材可任衝邊請以爲山西按察副使備兵薊州薊州
者古漁陽塞也地居左輔當虜所入道備兵使者往

往即拜開府故以屬子冲云子冲至而董將軍亦從上谷移屯北平塞下與子冲同事相得益歡稍稍取戚將軍所建後所廢墜者一切補苴規恢軍聲大振而會董將軍爲忌者所中解印罷去以張將軍來代張將軍者上谷人亦嘗與子冲同守昌平一日馳而失營墮子冲笑顧從騎前掖將軍也射又負子冲所因內愧恨之至而與子冲相左中丞臺有所欲護子冲竟置之法中丞亦恨子冲張將軍出故政府門下心知中丞指而力能中之政府主爵弗能難也遷以爲河南參政曰極知其才望特少抑之耳子冲在北

遂久雅欲有所建樹及徙內地官雖少進實無所施
因不能無鬱邑去之明年值萬壽聖節奉皮篋入賀
因以母病請急罷歸歸之明年朔方軍變東西用兵
臺諫爭薦子冲從告中召起補今官然不遂用之行
間而以爲旁道亦非其好也念欲上疏謝不出予馳
書勸之曰國方有難不得以親爲解遂趣裝而西行
至河內輒病瘞疽漸數日渡河又沒其所乘善馬心
甚惡之西至興平疽大發臥故人李公舍使使上書
未報而子冲卒嗟夫以子冲之才無論位遇乃所就
若此惜哉子冲爲人沉雄跌宕器識絕人規畫事機

皆有大略不爲饕餮之算其才縱橫險易無所不宜而不能爲浮文小禮以適人耳目平生尤慕俠節卽邑里少年鬪雞踞鞠鳴瑟跕屣之娛亦無不與其間而不能與俗士俯仰雅以文章自命睥睨千古客談藝文其側氣白眼仰天爲常聞也平生所心服者惟其師李先生一人而已其爲文觚規意象本諸李而不純用其體稍按事實更爲平易歌詩沉雄淡雅卽未至李而能不失其法要其所已得業足稱雄一世而著述未廣少所流傳爲可恨也子冲同邑所善卽子長與王子利子長者故太僕少卿鯨也長於子冲

而屬甚卑子利則同舍生此兩君名聲韜藉卓然不
羗皆子冲所厚善而子長與予同年遊亦甚歡故相
與撫其行事紀之云子冲卒數月可大以大官丞上
書適居田里過而哭子冲與予別去子冲生嘉靖丁
未卒萬曆壬辰得年四十六歲

陝西布政使司左參政趙公雲翔墓碑

公趙氏諱雲翔字元舉壽峰其別號也自前世爲平
陰人代有隱德父諱廷實累贈陝西按察副使母蘇
氏累封太恭人凡有四子而公爲長公生而迥秀不
羣績學工文號爲儒士隆慶丁卯舉山東省試明年
戊辰第進士授文安知縣視事踰年察能調遷安威
惠流聞課最左輔召入爲戶部主事司摧滸墅監兌
湖湘皆以賢聞復改兵部歷武選職方郎中贊襄區
畫事有成法大司馬倚重焉擢拜陝西按察副使兵
備榆林治餉理戎軍聲大振三年秩滿晉本省左參

政備兵如故以太夫人年高祇求歸養撫臺梅公固
爾不可會丙戌大計言路有忌公者臨期竄入其名
有詔賜罷而公已解組歸矣制府邵公聞之大憤曰
以趙君之賢中考功何等法也疏訟其冤詔下按臺
核狀未報而朔方兵起諸大夫將以邊才薦而公病
困送不起矣公爲人魁岸豁達豐下甚髯舉止闊大
不爲小文雅善談說捧觴揮麈雜以諧謔終夜不休
有味乎其言之也故事當成敗與邊圉大計咸如燭
照事無難易迎刃而解人所感頷一笑有餘其在文
安築隄障水民不爲灾嚴備察奸寇竊遠迹邑多中

貴操縱失宜舉能梗化公一切解去邊幅接以恩禮而法紀明肅無所假貸中貴感且畏之無敢以私干者遷安地近制府在遼薊之中徵發送迎急如星火而公從容辦治如取如攜民弗聞也時奉檄行視塞上利病及將吏功罪核報如法奸慝無隱而未嘗馮怙作威有所侵冤故上下信焉其在上郡套虜挾邊尉以請願得受賜如代雲中邊尉無以難也公聞狀馳詣塞外召諸酋長諭以威德使奉初約酋長噤不敢對受職如故一軍壯之其居家庭孝友姻睦門庭藹然田產貲財若無常主三弟居積溫厚幾與公等

其處鄉曲降顏折節不作貴態故人父老握手道舊
歡如平生人亦忘其貴也夫其韞藉識畧風采行誼
卓然一代之英而不究其施且以中壽沒焉天道謂
何耶平陰爲岱西奧邑山川完密風俗淳美二三大
夫皆以名德著聞而位不大顯咸謂善極而發所鍾
必厚故吾於公有深望焉乃亦若此止焉何耶

陝西布政使司右參議李公柰墓表

天順壬午某月日陝西布政使司右參議致仕蒙陰
李公以疾卒於家壽七十有三成化丁酉其子戶部
郎中炯然謁予表其墓按狀公諱柰字時珍姓李氏
其先隴西鉅族八世祖讓元金牌千戶始徙家蒙陰
高祖彬卿曾祖敬元迪功佐郎判益都路沂水縣簿
祖燁考昇皆隱德弗耀考後以公貴贈文林郎四川
道監察御史妣倪氏封孺人公自幼岐嶷如成人長
游邑庠治春秋深得聖人養取大青齊魯學者多師
尊之永樂庚子領鄉薦第二登宣德丁未進士除行

人司行人所至宣布德意誦誨善道克舉厥職以薦
授南京四川道監察御史務持風裁糾舉不避權要
南京守臣不法公率同列論之爲之少戢尤惡貪暴
有王御史者嘗納賄公按之或曰彼同僚也盍少假
公曰御史爲朝廷執法不敢以私親廢況同僚耶工
部王員外尤黷貨每以賂免及是爲人所訐公卒按
如法刑部徐郎中素刻深有法不當死者而杖殺其
母子二人逮赴鞫治徐與公有舊冀得寬假竟以酷
刑坐罷由是有鐵板李御史之號蘇豪民擊人碑其
而施公鞠之衆皆證非枉豪以尸無傷弗承公屬

聲曰爾殺人而陰易其骨將誰欺耶豪色動一訊而
伏乃知彼賂守尸者以他骨易之也衆驚爲神胥人
邢小四其里有富室同姓而戎籍者賂里胥移其籍
於小四復拘補伍小四按籍當行屢訴於藩臬臺省
莫爲直公查遠年籍冊事始白於處獄尤慎重囚婦
王季奴隨其夫罰役北京夫道亡季奴獨攜幼子還
巡司詰之謂其殺夫也季奴不勝拷掠遂誣服械送
南京法司錄其無冤將棄市適公監刑閱其案不見
其夫體所在且察其容色若甚戚者問曰得無冤乎
季奴泣曰冤誰復肯辨耶分一死耳若求平反必更

加拷掠又不知幾死也公疑其情不忍行刑同事者
曰法司已有成案何用疑公曰死者不可復生奈何
局於成案而輕殺人耶後於他所獲其夫季奴得不
死時荆南張都憲純掌院事凡他道滯獄弗決者必
以屬公吏抱牘至見有公署字不更視曰李御史所
錄必無冤也其見信如此正統丁卯滿九載進階文
林郎戊辰春冢宰抑菴王公薦補陝西參議旬宣所
至務以宣上德訪民隱爲急事有便於民益於國
者靡不盡心爲之明年督理河西邊儲邊士賴焉王
都督敬爲總戎注意兵備黃河迤西惟涼州兵號最

精王以公盡心國事深加禮重在河西及期當代會
邊報益急代者逗遛河東弗敢進左右勸公起駕過
河以避公斤之曰吾荷國恩叨寄一方而今邊徼有
警宜以死報國奈何去之竟候代者至乃還先是朝
廷以虜勢猖獗命陝西守臣預爲防守時承平既久
武備多廢欲委官簡閱之衆皆憚行公毅然曰主憂
臣辱今國家多難正臣子盡節之日可避勞耶乃請
自行往來秦隴延慶間晝夜不遑寧處一卒一矢必
躬簡閱由是士馬精強兵威大振偏頭關戍卒乏食
委公督運轉輸千里餽餉以足守臣以鄜州路當金

湯白豹之衝恐虜騎突入議設兵防守朝廷可其奏
衆亦規避公復請往既至繕甲兵練士馬築城浚隍
晝夜防守一方以安慶陽民苦饑有司不敢擅發適
公至責之曰民以食爲天七日不食則死矣爲民父
母忍坐視其死耶卽令發賑之民有逋賦積歲不完
有司嚴刑督之公嘆曰民困故不能輸耳柰何以刑
因解其繫從容諭之同官笑曰彼頑民督促之且不
肯輸顧寬假之彼肯輸耶民皆感激相語曰此吾父
母也吾屬可不勉而使之貽譏謂乎於是爭假貸以
輸卒無負者故西人有李佛兒之號參政孫毓田戲

曰君爲御史人號鐵板今爲參議又號李佛何前剛而後柔乎公曰御史尚彈壓參議貴撫循官固不同政亦有異可一槩施耶孫服其言景泰壬申才逾六十卽上疏乞歸朝廷許之旣歸築別墅於寶山西麓日與故人賓客談笑觴詠爲樂教子孫讀書課僮奴樹藝以自娛優游十年易簀之際神氣不亂遺命惻然曰吾遭時發身官至方面得保首領以沒固無所憾但念國恩未報汝今忝科第他日當盡忠所事以補乃父之不足卽吾死瞑目矣公爲人恬淡寡慾於世利紛華泊無所好性孝友蚤喪母事父能順適志

意既沒哀毀逾禮及仕以祿弗逮養語及輒流涕歲時忌日祭必盡哀撫幼弟極友愛弟嘗溺其田產爲贖還之旣而又鬻又贖終無怨意弟卒撫其二孤無異己子悉力爲畢婚娶宗戚故舊有貧乏賑之恐弗及與人交至誠不欺或有過爲之掩覆有片善則喜談而樂道之尤喜汲引後進督儲涼州少暇卽進諸生爲之解析經義教爲文章學者爭自濯磨涼素乏科舉次年歌鹿鳴而升者三人公造就之也自奉甚儉約居常食不兼味嘗營居第子弟務求堅久公曰苟蔽風雨足矣何過爲千百年計哉遇人窮困則矜

之不吝鄉人嚴剛負京租公罄所有代輸之嚴貧不能償止一女欲歸公爲侍婢公卻不納卽出券焚之其女後嫁良家子公沒女哭盡哀如喪父母持身廉介雖爲寒士時非其義一介不取鄉有鉅豪少以不義致富晚年愛禮賢士素慕公賢以厚幣招之公辭不往或隘之公曰吾聞君子不飲盜泉之水况不義之物而可受耶居官所在有水堊聲嘗使藩邸外國賜遺甚腆一無所受道經順德里人張時爲郡守延欸數日見所持囊中意必遠方珍物探視之乃黃連數裹蓋公素苦目疾故爲之備也致仕歸所積不足

克道里費身後惟遺書數千卷而已退居林下而心
不忘朝廷每聞登一正人行一善政輒喜形於色否
則愀然不樂者累日鄉人愛慕其爲人一言一行輒
取以爲法其訟不平者是非曲直惟於公取決行不
今義者不畏有司之戮而惟恐公知之邑大夫政有
所不通必造廬咨訪藩臬重臣及四方賢達過其邑
者未嘗不求見黃忠宣公嘗曰士如李時珍當於古
人中求之大司徒楊公亦謂公名實相符無愧古人
人以爲名言平生著述有春秋管窺王霸總論藏於

陝西布政司左叅議王先生徵墓表

李東陽

先生姓王氏諱徽號辣齋尚文字也以應天府學生
舉景泰丙子鄉薦天順丁丑禮部會試丁外艱登庚
辰進士第授南京刑科給事中調貴州普安州判官
權陝西布政司左叅議致仕後用詔例進階中順大
夫以卒其爲諸生已受知提學孫御史鼎爲進士預
選庶吉士內閣李文達吏部王忠肅二公試春雨詩
百餘韻奇其才以限年不果用爲給事中上疏言經
筵宜講治鑑以考得失大臣有小過宜優容以存體

貌武臣多債事宜先黜本兵不職者以端藻鑑內臣
寵眷宜稍爲減節庶可使常保貴富 憲廟登極大
婚成屬有更易先生率同官追論司理牛太監玉首
罪併及內閣欲中以危法 上素寬仁竟不深罪乃
有普安之謫地極險陋先生不鄙夷其人導以禮義
土官有嫡子當襲爲族人所爭以賄請先生斥使去
卽日具勘狀歸之有武官貪縱事覺先以生魚假廩
人以入先生曰此非地產必出某氏將飭我也卽案
其不法數事鎮守內臣爲請竟不能奪居七年爲吏
部敦迫上京師復謝病去又十餘年入 孝宗朝言

事者論薦不已朝廷知其名時王端毅公爲吏部特
起爲參議延安民驚不共稅先生以理開諭不施鞭
朴徵以萬計邊河諸郡歲苦衝決勞費不貲先生謂
若以所費疏其上流可以永逸已而果然蓋雖遷謫
沉滯不爲怨懟而隨事補益乃如此然自是已無意
仕進於後得請惟日謳吟述作與諸名勝甚酒爲樂
雖達官貴人未嘗報訪貧無餘貲舊所畜書畫或以
貿易爲活不介意所著有辣齋稿引笑集史疑若干
卷詞意清遠作者鮮及吏部侍郎儲靜夫誌其墓謂
先生剛大若不易親接之者無不意滿坦易若不屑

世故而遇事明決莫之或欺豪爽若不受羈束而讀
誦終日凝然一室未嘗厭倦儲雖晚進亦稱知己君
子曰不誣子韋世守文行舉弘治己丑進士爲庶吉
士當留官翰林以父老不忍違養就南京吏部主事
旣服闋以母老就南京兵部其孝可稱論者又曰王
先生有子矣王氏本出河南考城元季徙應天之江
浦曾祖諱仲祖嗣宗皆有隱德父寧贈普安州判母
胡氏贈孺人繼母楊氏封太孺人配俞氏繼楊氏皆
贈孺人再繼徐氏贈恭人側室吳氏封太安人韋所
出也先生壽八十有三生宣德戊申十一月卒正德

庚午七月以其年十二月二十三日葬其地曰長泰鄉祖堂山之原在都城南三十里

陝西布政使司右參議王公徽墓誌銘

儲 懌

正德庚午七月七日陝西布政使司左參議致仕進階中順大夫辣齋王公卒於南京之私第享年八十有三遺命子韋曰予平生故人鮮有在者晚得儲靜夫號知我墓中之石汝其往請銘於是韋列公世次事行遣使以書幣來請懌既進使者問而哭諸次因慨公之銘宜得宗工鉅儒顧諉諸懌懌以病戒筆研

久且陋不足以知公尚敢銘耶重惟屬纊之託而韋
再以前書超語哀甚卒辭不可謹敘而銘之敘曰公王
氏其先河南考城人元之季徙江浦國朝隸錦衣衛
始爲南京人公諱徽字尚文諫齋其號也天順丁丑
舉禮部進士以外艱庚辰始廷試對策數千言援據
古義論及時事讀卷者擬及第都御史寇琛嫌其語
直抑寘第二甲第三人選庶吉士試春雨詩公倣栢
梁體頃刻賦百餘韻李文達王忠肅相顧幸得入會
詔限年以選公不與兩公甚惜之除南京刑科給事
中憲宗皇帝初臨朝公率同官言五事大略謂古

昔得失載於前史乞經筵兼講通鑑綱目無所隱諱
朝夕取爲法戒諫官之言有可採者乞戒有司勿廢
滯權倖者不得假托以中傷之選任大臣宜隆禮貌
大罪不可宥小過不可辱庶人知自重而名器尊近
年將領多以私瞞進驟本兵者非其人先黜尚書昂
擇人以進退之則將可得最後言禁近之臣宜悉遵
舊制使無它與否則始雖愛之及其敗而治之非保
全之道其言尤備上皆嘉納之踰數月適中貴人
謫至南京公諗其故倡同官曰是可輕貴乎操筆具
疏一日而就一曰明刑罰以正朝綱二曰監往事以

防後患數其大不韙之罪四乞寘諸法因指斥執政者之不職曰必如是斯可以善後奏入聞者皆爲震懼有欲以危法中之者給事中御史爭上草論採賴天子仁聖仍其秩俱調遠州判官公得普安州普安貴州邊徼也公至興學諭俗其習稍變始有舉於鄉者土官範塞死子當襲族人爭之都御史視公爲予奪以賂數千求助公不納卽日勘任之白千戶者富而罪卒訢之獄數年不決卒詣都御史曰須王判官來乃白千戶覘公何如以生魚數頭假廩人以入公曰若地無魚其出白氏乎卻之按其諸不法者竟抵

其罪判七年秩將滿父老上書留爲守都御史恐滯公也不聽去之日遮道泣送焉歸南京三年尚書尹公旻頗屬意遲公考滿託府丞昂從吏之公至京請休致尹公曰給事望重它日人究出處責在我矣請不已以例聽公且歸凡十有三年弘治初王端毅公居吏部始薦公拜陝西左參議公爲一起分蒞延安望田均徭民平邊給踰年忽有所不樂遂謝病歸當路於陝者爭留之公堅不可奪已時年六十有三也公天資超悟刻意問學考古今成敗治亂務求其要自諸生已慨然有當世志孫御史鼎馬府尹諒皆奇

之京兆特月給帑錢爲學舍費及居言路冀以次論
列天下事一再言遽被謫故天下士誦公之言皆高
其識壯其直一時侍從臺諫若侍郎葉公盛編修陳
公音相繼留公者章至十數上不已自陝歸樞門不
出聲聞益重名頃之士多以公傳擬之論治每誦張
宜公語無求辦事之人當求曉事之人論士習惟以
廉耻不修奔趨日下爲極可憂嘗曰今仕者以耐方
爲刻息緩爲寬學者以持正爲滯恬軟爲通文者以
典雅爲淺惟刻爲古健皆後生所宜深戒矍與林
待用夏廷章間從公遊聽其議論輒相咨歎不及公

之壯而究其用考公平生尹公似知矣而不克薦王
公薦矣而用違其長大學士商公奉召過吳武功伯
訪以亟起公爲規商公屢薦之亦竟不果甚哉遇合
之難也然公守義篤信不肯少貶以苟合可謂無愧
其言者矣公文章師韓歐詩倣王維劉長卿筆札道
勁鑒別古器若書畫尤稱精博有鍊齋稿史疑引笑
集若干卷傳於世子卽韋以進士改庶吉士授南京
吏部考功主事賢而有文其最公行有曰公嚴若不
可親接見之者多得其歡心豪爽若不受窘束讀書
一室凝然終日簡牘不煩於事然孝友慈恕百務整

悲坦易不盡人情然忠信明決人莫敢欺蓋得諸家
庭人無間言者

陝西布政司參議賀公欽傳

公名欽字克恭別號醫問先生世縣定海其先戍廣寧後屯爲遼西人少穎敏沉厚好學偶得近思錄朝夕旣讀成化二年舉進士爲戶科給事中見白沙論學嘆曰至性不顯賢藏猶霾世卽用我而我奚以爲用卽日上疏解官去執弟子禮事白沙旣別肖其像懸室中事之甚謹泰陵初薦授陝西參議撫治商洛以老病毋憂上疏懇辭且陳四事一曰資真儒以講聖學二曰薦賢才以輔治道謂新會縣歷事監生陳獻章天性高明學術純正誠當世之大賢爲士夫之

矜式宜以非常之禮起之或任內閣俾參大政或任
經筵使養君德三曰遵祖訓以處內官謂內府監司
局庫衙門載之祖訓內官條其職掌不過灑掃供養
關防出入等事而已近年如王振喜寧舒良王誠曹
吉祥牛玉汪直尚銘梁方陳喜輩或陷主虜庭身叛
賊境或主易儲君禁錮南內或謀爲不軌賄易后妃
或邀功啟釁漢每邊敵或恃寵招權納賂不貲或引
用左道蠱惑上心或導進淫巧盜虛府庫此其陷
君誤國蠹政殃民昭昭在人耳目宜深鑒已往之弊
內不可使職掌奏牘得預大政外不可使鎮守地方

掌堦兵權則非惟國家無疆之福亦宦言無疆之福也四曰興禮樂以化天下謂陛下紹基之初舉行朱子喪葬之禮但初政之施方發其端而頽敗之俗尚仍其舊禮讓之化未行淫穢之風日甚乞申明正禮之當行革去教坊之俗樂疏入報聞允公辭正德四年逆瑾括田東人驚疑思亂義州以守臣貪故遂先發聚衆縱火劫財大擾然相戒曰毋入東街驚賀黃門公聞往諭之曰渠輩既知悔卽不殺人可解鎮城當有人至爾輩直拜跪求生慎無殺人已而撫鎮人果至須臾有言軍至且勦者衆復呼譟曰賀黃門無

讓語又趨跪公里門公曰城中擾亂至此鎮城焉得
不發兵雖至爾等第不殺人必宥爾無恐衆遂定城
中不傷一人公不務博覽專讀五經四書小學靜思
默識反身實踐冠昏喪祭遵用家禮每教人讀白鹿
洞規小學鄉人由是興於行義老更好易究心象數
手不釋卷卒鄉人祠之凌溪釣臺子士諮鄉貢士博
學篤行嘗陳十二事論王政不報辭疾歸終身不仕

陝西參議戴公恩墓志銘

孫承恩

戴氏之先汴人從宋南渡居臨安國朝初再徙松之
上海故其著姓最遠元時有諱善卿者爲海運萬戶
善卿生德三仕元至提舉德三生產文產文生聲伯
聲伯生暄暄生春以進士爲考功正郎陞順慶府知
府有聲天順成化間春生諱則考功也公諱恩字子
充東濱別號少穎悟儀狀端雅與弟慈在黌校俱以
俊稱舉正德辛未進士授北京工部都水司主事監
浙江抽分事還收支營建乾清宮物料未幾轉員外
郎督運營建大木戊寅進秩郎中階奉議大夫奉勅

專理儀真至臨清河道庚辰權陝西參議未上官以
疾懇乞致歸公爲人外若散懶而內實機警明悟其
監抽分也值歲課不登人謂難爲之處公曰吾寧以
是獲戾不能効培尅吏也御史王堯封特爲奏免其
職營建也出納物料總理慎勤有白金文綺之賜感
涕賦詩淬勵先是運木以民夫所在勞擾不能堪公
亟請用近京軍裔替人領其德其職河道也興舉廢
墜刻條蠹弊重開寶應裏河增修谷亭上下埧閘驛
傳多空匱復苦權勢橫索無紀轉益不支每公使至
輒輒稽留不得發公悉爲之處漸見規制 毅皇帝

之南巡也郡縣吏往往棄印逃譴公獨與總理河道御史龔公弘經畫供億送迎百務斬斬坐毀勞構疾因有歸志比得請時方五十有三乞身於未衰可謂達於功名之際矣夫仕者多徂於不知止卒以因敗此君子之所惜而常情之所忽也公於出處如此豈非賢哉公在少時卽負志不羣思繼述先德旣以科第踵美尊榮其親贈厥考官郎中母江氏贈宜人及謝政歸益振拓先業檢緝遺文所以光前裕後者弘且遠矣天性直率任情脫畧晚得重聽疾益不能款曲人頗以簡伉病公然實無他也公生成化庚寅十

一月卒嘉靖戊子十月年五十

陝西布政使司左參議盧君襄墓表

文徵明

嘉靖十年辛卯閏六月八日陝西參議盧君卒於家
年五十有一先是君爲武選郎中有兵官驕悍喜訐
君以職分臨之遂爲所誣逮繫詔獄有司畏其人莫
敢申理賴朝廷聖明卒白而出之尋有陝藩之命時
君已被疾抵陝聞其父御史公之訃疾遂加劇至家
數日遂不起嗚呼傷哉君諱襄字師陳國初有爲青
州府通判者始徙居吳之橫山遂爲吳人高祖彥實
曾祖立祖士誠父綱以長子貴封河南道監察御史

母孺人陳氏生君兄弟二人長雍仕終四川提學副
使次卽君自幼穎異讀書不煩督率稍長受易於提
學君旣而卒業於高安令周君振之已又爲都御史
徐公仲山所知徐公撫山東遂攜以往比歸又遊王
文恪公之門遊道旣廣造詣日深弘治甲子以儒試
應天不利歸補郡學生丙子再試遂中高科有司錄
其經義以傳嘉靖癸未登進士初授刑部主事改兵
部職方主事丁亥陞禮部祠祭員外卽戊子再陞兵
部職方郎中尋改武選君初官法比卽思以政業自
見克勤其職暇輒檢閱故牘求其傳爰論報而習之

故折律詳明不少孰縱然亦不事深文有竊盜四人
法不至死御史掠治當以三犯君閱實以初犯抵罪
或以成獄爲嫌君曰避嫌而殺人忍爲之助乎卒論
出之故雖不久而所平反爲多其在本兵尤留意戎
政嘗奉使校閱邊關及閱馬近畿所至訪材官謹亭
微展采錯事尤多緒正又嘗奉命典試江右嘗閱明
審取舍惟公凡名流久淹場屋者悉見識拔一時稱
爲得人君立朝未數年凡問三部皆在本科本科者
凡諸曹章奏悉從閣決君所在職辦諸尚書並器重
之然亦操切彊執不爲時人所喜其橫被口語亦以

是也君長身子立而矜嚴自持羣坐中不妄出一語而其中于奪分別未始少失尤善廉事有所審盡必中事機遇政有缺失或民間疾苦必具疏以聞如言維揚賑饑西北邊備及江南農田敝事皆經遠之謀非徒苟為圖塞目前而已雅性喜學家居時每得異書輒手自繕錄既仕益勤雖簿領叢沓而不廢佔俾為文專腴明暢能達其志詩尤精詣不苟出出必求過人所著有五塢草堂集所編集有石湖志石湖文集盧氏世譜他所纂葺多未成書君文章政業皆以古人自期視一時曹耦莫有當其意者使天假之年

其所見當不止是顧方精進有爲而遽及之可哀
也已君家自彥實以來世業農至御史公始讀書啟
授鄉里而君兄弟相繼起進士皆至連率顯官又皆
以文學政事著稱可謂盛矣會未幾時皆以盛年卽
世吾不知造物者果何如也余交君兄弟僅二十年
見其始出而仕仕而歸以及於死始終盛衰如電露
奄忽能不有槩於中乎因表其墓著其志亦用抒余
之悲云爾

陝西參議潘君高墓志銘

徐階

嘉靖丁巳正月八日陝西參議春谷潘君卒年四十
有四君自幼以才顯名年十九登進士第授大理評
事當是時朝多賢士大夫文章政事各以所長相高
而其篤志好古者則又相聚以講良知之學視文與
政以爲不屑爲而彼亦詆此以爲僞勢幾不相容君
盡遊其間論雄詞辨莫可窮詰諸前輩相視以得君
爲重於是君名益聞然忌者亦益衆每諸司有所建
白其詞稍不襲故常輒譁曰春谷筆也出之陝西踰
年以前大理罷官其祿食僅九年年二十八耳君旣

龍論者咸謂處君太過君亦痛自懲思盡屏去華藻
以就精實士大夫乃更賢君凡持節蒞晉者文章以
薦竟格於例不果用嗚呼若君者其信可謂生之難
而毀之易矣昔歲己亥予與東郭鄒子荆川唐子念
菴羅子同被召爲宮僚獲徧交一時名士而君與焉
其冬君入關明年予以憂去三子亦相繼罷黜今予
幸登朝而三子者猶未召君又已作土中人予安得
無惻然於中也君諱正字子抑春谷其號先世居廬
之合肥國初有諱與者從 皇祖起淮泗拜山西寧
化所副千戶遂爲寧化人興孫銘以功遷正千戶銘

孫璟生五年而孤其母節婦施鞠育之既長能其官
數考軍政第一君考也君方姪時母王孺人夢蛟入
懷晤而生故君才與貌奇偉豁達措諸施爲排難解
紛濟難應猝人所不足處之有餘乃其在陝西釋繫
囚均賦役搏擊賊吏禁戢豪宗特其可見之淺淺者
而位與年皆止於此非命也夫

陝西按察司按察使王公英墓表 吳寬

元入中國據之其末世政益弛俗益壞天下悉變於夷而澆薄奢僭大抵與賈生之論秦者無異我太祖高皇帝起而救之用重典以治頑民由舊政以修廢事一時口給心計號多才能雖多舉用輒見剪除其卒在位所以輔世而長民者莫非質直惇惇之人而天下之俗遂還于厚若故按察使王公其一人也公諱英字俊伯蘇之崑山人初從鄉校貢入太學以諸生選授監察御史久之高皇帝察公可用特命署都御史事而大書敦厚王英四字揭于殿柱以勵

百官當時朝士以罪去者比比而憲臣尤甚公獨以
秩滿陞刑部郎中俄出知寧海縣蓋欲以民事試之
也及太宗文皇帝嗣位知公名召還復郎中尋擢
陝西按察使丁內艱服除改山西秩滿仍命治陝已
而得代還行至泗州疾作而沒享年六十三公立朝
守正不阿旦夕兢兢謹畏每顧其妻子曰吾以身許
國其勿以死生爲意但吾發死於正足矣乃絕不問
家事而時具疏有所建白上知其忠直也多嘉納
之然疏入輒毀其藁人不得而知也及長臬司務以
簡靜爲治獄至而決雖不爲強辯深文而巨奸宿蠹

恐懼首服不能隱其罪至待察友和而正寬而有容
凡所設施人皆取以爲法固有千里之外聞公之名
而感慕者公平生不立聲譽居官凡四十年得其事
行蓋若此然足以見公之爲人矣予觀國初多鉅人
長者如洪之石建周仁張歐輩豈惟有益於時用能
保其身全其家傳其子孫其淳厚之風遠矣公旣其
人迨去世已久凡與之處者猶不能忘故靖遠伯王
公驥剛毅少容以與公舊寮也追念之不置嘗致手
札問訊其妻子所以周卹之者甚厚葉文莊公於公
爲鄉後輩拜公遺策贊之爲名賢而至于今邑人尚

能談其居鄉里時一二事曰公一日行道傍有負甕
者柝公墮水中怡然解衣而歸他日復遇于道其人
知爲公也棄所負而走公使人追還之嘗微服入吳
市門時適有韓禁門者執公爲庶民宜有罰公笑曰
吾官人也門者不信取冠服示之始釋其縛公亦不
怒邑令盛設酒饌遂公辭之竟赴鄰舍飯或怪之公
曰鄰翁貧治具不若邑令之易且官府吾可輕入其
門耶蓋公平日未嘗有私謁至人有以私事干者輒
退謝之曰吾不能爾其他事大率類此此蓋可以見
公之爲人也故書以繫之

陝西按察使何公自學墓表

薛瑄

何公諱自學字思學其先閩人遠祖諱瓊者仕五季之周爲尚書僕射瓊子輝爲屯田郎中始家金谿今爲金谿人公曾大父諱伯啓大父諱宗哲父秉煥號綠水翁比三世皆修已行義晦迹弗耀綠水翁娶曾氏有婦德生二子長卽公也公資性夙敏舉止異凡兄綠水翁知其必有立入歲卽遣從鄉先生游讀書數遍輒不忘江西按察司僉事行部至金谿還鄉學子弟可充州廣員者得公大喜卽拔登邑庠時年十五矣公遂從孟司訓授書經益肆力於學比弱冠已

自習熟諸書世所謂舉業者綽有餘力間爲古文詩
章尤渾厚清新有作者步驟公試鄉舉一往卽中
列登宣德丁未進士第初任刑部河南司主事公以
貧之象曰明庶政無敢折獄故折獄於庶政爲大於
是早夜以中正明達自勵盡心獄事時稱明允如辯
冤獄白能等事蹟俱入史館編錄值 朝廷選刑官
之能者分理天下滯獄公首被推擇得閩浙公旣奉
勅以往雖山郡海邑惡瘴狂飈有所不憚必親至其
地爲疏理其繫囚二藩旣大以遠人得昭雪而蒙其
惠者甚衆公竣事還未至而巳馳聲京師適歷官三

載例得推恩綠水翁封如公職曾氏封安人公復上
章乞歸省詔許之且賜以楮幣公并以所得恩賜白
金之類悉歸奉二親一毫不入私室一時之榮慶孝
義動於里閭正統三年公爲廷臣推舉陞廣西按察
僉事其地乃嶺表百越溪峒猺獞不時竊發剽攻甚
則徧之以兵雖得少靖而民已病於餉運公於所分
巡地必大示威信猺獞雖蠻然亦知畏服因得減征
行之擾其編民亦雜夷獠不通道理每構訟輒爲諍
張詞不可究詰動引百十人連歲不已公嘗偕奉勅
印審錄所部繫囚其勤慎如在閩浙時夷獠積年久

滯之獄咸得伸理既而丁綠水翁憂營葬一如古禮復廬居墓次者三年釋服調除山西按察僉事其憲體益謹而尤能興學以教人表廉以厲貪時大同方宿重兵以防控荒外利害繫於守將公常巡部至其府作書勸其守將當協和共事者以濟邊功後來事多如公所料人服其先謀未幾復丁母安人憂歸家山西巡撫及三司連章以謂山西邊事方殷古有金革變禮之制宜奪情何某以任事詔從所請公復官未逾月詔陞陝西按察使公既屢更法司事任益詳關於大體洞達其細微及長外臬司凡端澄聽折表

拔刮剔之政以次行之令修於庭戶風行於方岳事
方就績竟以暴疾卒時景泰三年正月享年五十有
六余猶記往年公過余河汾出二書其一卽勸邊將
協和共事者其一與冢宰論進退賢否之法甚備公
又語余曾爲執政者言當起退休老成者某等用之
於乎使此三者得行於時其有補於世亦豈小哉

副使謝孚傳

謝孚字以誠號易軒其先自京陵卜居姑孰遂占籍
甯塗焉祖德明在元時由諸生受辟從事本路至江
浙行省掾除江南行御史臺照磨丁時多艱厄卽棄
告身歸隱父興甫亦以隱德聞孚自少穎悟拔出該
書強記治易有玩索功故以名軒永樂三年領鄉薦
明年登進士第賜勅諭歸鄉以成德業五年徵回除
陝西道監察御史潮州百家畚恃險奔突搔擾屬邑
太宗文皇帝命孚與都指揮趙德勦捕孚乘傳至
潮先行招諭復徵近地官軍勦捕一方用寧時有事

北方糧餉旁午行在都察院復以平督運口北事完
扈從回還 陛見陞福建按察司副使丁內艱起復
調陝西按察司副使所在有明允聲中貴蒙附石有
事於邊道經咸陽三司設宴接款時平掌司事獨不
跪蒙怒甚平言 朝廷重方岳欲其表式下僚也不
得行其志則已豈可自屈於人乎竟不成席而罷正
統三年九載考績力求致仕歸卒于家年六十三以
子騫貴贈中議大夫贊治尹

陝西按察司副使莊公觀行狀

張楷

明理屬詞謂之學成已成物之謂道篤行孝弟謂之行三者一理而已能盡此者吾於友兄莊公見之公諱觀字居正歛之莊村人年十四執父喪有禮弱冠游郡庠才識穎敏讀書過目成誦同輩皆推讓之永樂辛卯以春秋應鄉貢明年會試中乙榜分教浙之義烏公素明理善屬詞造就弟子有法歷三科得秀士八人皆爲世用滿考優等陞辰溪教諭一以教義爲者教其弟子文風翕然未幾丁內艱起復赴京擢國子學正弟子居座下者皆知明理屬詞出而從宦

悉能推公所教以措諸用正統改元新制每省以憲
臣董儒學治大臣各舉所知大司馬王公驥以公薦
擢陝右按察僉事董八郡秀士以督其成公首立教
條次嚴紀律務期成德達才之効陝西疆里散闊山
川險阻公不憚勞苦歲一躬蒞必得其實以故八郡
士子爭先奮勵以學成名立爲期若咸寧楊鼎之占
會元與蘭縣黃諫鳳翔劉俊相繼及第入翰林有名
其他第進士者屢科不缺咸著英譽若都御史王竑
任寧之類予嘗與公同出行部曰學校以明倫爲先
文章末事耳郡縣遵其化雖夷狄之俗皆尚廉恥公

德所致也諸生有聰慧出衆進益學業者則喜形于色愛養如至寶語予曰西人得此寶翹萃者也吾獎之以礪諸子俾各觀感以盡力其造就人才類如此九載秩滿例得陞秩今少保吏部尚書東閣大學士王公時以都憲出鎮關中恐公之去而士子失望特爲之具奏陞擢本司副使仍董學校又三載是爲景泰改元奉表赴京遂上書乞骸骨旣得請則挈其男女還鄉公自筮仕卽迎其母宜人赴義烏恪盡孝道又陞辰溪母歿哀毀踰禮復以其餘葬無力者十餘喪今引年歸老益篤孝義念兄璿同祖同弟興同相

繼淪歿諸孤幼穉公斥餘俸分給之教育無異已子
有餘則濟里中貧乏及修橋梁道路以利衆人而於
家廟之制則率率焉務勝他族歲時祭祀必備禮物
極誠敬亦爲他族所稱公之曾大父天錫祖廷璧皆
隱德弗耀父永寧以公貴贈奉政大夫陝西按察司
叅事母張氏

陝西按察副使劉公安傳

李濂

劉公安字元靜世爲大梁人曾大父貞博學工文辭
元至順辛未以茂才薦授國子監學錄大父士謙讀
書好客嘗於所居東偏構軒扁曰延賓每客至必設
酒留款劇談今古聲塵忘倦父榮公直孚于鄉曲以
公貴贈文林郎山東道監察御史母陳氏封太孺人
公體貌敦厚少厲志節入開封郡學爲弟子員治周
易夜必衣冠危坐誦讀達旦久之大有所得朋輩咸
退遜以爲不可及登永樂癸卯鄉舉宣德庚戌春會
試南省中乙榜授山東金鄉縣學訓導克勤誨士部

使者薦之擢山東道御史公慨然以功業自期明憲
綱究律令劾姦洗冤振揚風紀事有難處者都臺必
屬公無弗竟者嘗奉命巡按南北京畿風裁峻整公
在道九載景泰庚午春以大臣薦擢山東按察司副
使用法平恕恒存欽恤之意至遇渠惡巨猾爲民厲
者則不少假貸由是吏畏其惠聲稱籍甚逾三載丁
內艱還汴天順戊寅秋服闋復除陝西按察司副使
應詔陳時務三策一曰從祀謂我朝開國以來養士
百年豈無真儒可續道統之傳請勅禮官推訪著書
立言扶翊聖道者列諸從祀以風厲來學二曰軍務

謂邊方軍士衝冒風雪不勝寒苦合議罪犯收贖照
例米粟革糗兼納頒給軍士爲禦饑凍之需三曰水
利謂濟寧上下凡有泉源去處宜疏通入河以濟舟
楫英廟可其奏次第行之甲申公年踰六十懇乞骸
骨歸與汴中二三耆舊詩酒倡酬以樂太平壽九十
餘歲論曰余聞汴故老言憲副公歸田時囊無餘貲
惟舊屋一區弗蔽風雨敝衣糲食出不能具驢車然
其壽獨高又曰憲副公清修好古晚歲嘗采輯古今
詩文之粹者若干篇分爲六卷題之曰資蒙寘諸家
塾以垂訓子孫今家世衰微而其遺事鄉邦無知之

者余蒐訪百至久弗能得茲姑據所聞書之無亦使
其湮滅亡傳焉爾

陝西按察司副使白君侃墓表

葉盛

天順三年廣東珠池之役合六郡兵民之衆而中貴
十五人者儼從官校寔多且將事銳甚時巡按監察
御史白君言之中貴人以爲珠固不敢稽也今西賊
久流如民疲何中貴人感動官校怙勢虐下卽能廉
得其實責之中貴人自治由是且慚且懼爲之斂跡
中貴人有欲屬叅吏者君不從曰叅吏有簿巡撫旣
出巡按承之巡按乃可爲巡撫欺耶未幾予來自廣
西聞有愛御史者嘗以太剛媒禍爲言君聞卽正色
曰侃未學初仕患在不能剛耳言者愧之嗚呼予治

廣者六七年直道守正不屈不隨如白御史者可多得哉然君之可稱殆不止是其巡按南畿時以六事爲言一正心身曰古者帝王誠意正心以修其身是以天下和平享國長久後世之君天性之高稍知道者亦能小康僅至中壽其他率多驕縱自恣凡蕩心喪志損身敗德之事靡不爲之是以喪亂相仍身多夭折也 陛下屬春秋鼎盛血氣嚮隆當以古帝王爲法後世人主爲戒其二勤務學人主不可以不學而學不可以不勤宜選碩德重望明識政體老成儒臣處之便殿從容論講裨益聰明脫此時不學後

雖欲學焉殆恐不如今日之易進且專也貞觀正要
陸贄奏議大學衍義三書甚切治道尤乞留意三曰
賞罰至公所以法天道後世如漢祖唐宗亦皆史冊
有書可爲後法邇者近習交結事露亟寘之法天下
聞之無不悅服所望於將來者愈堅此心一賞一罰
悉出乎公則治道可成四曰初政二詔利興而害革
軍民頌歌無間遠邇且聞大內珍禽草木悉已放除
外方貢物多已不納非徒言而不能行矣繼自今惟
在乎守初心行初政而已五精選練夫國之安危在
將戰之勇怯在兵祖宗承平甚重乎此如曰將非精

求士非素練難矣宜令集議京師各邊正副總戎謀
贊文臣分管都指揮等各精選得之具立條式俾彼
此相制上下相維一意操備而又嚴其侵漁役占之
禁庶得實用六曰石曹二逆禍將萌也臺官亦嘗有
言而反爲排擠如御史耿九疇御史張鵬楊璉之請
降是已 先皇聖明九疇等卽召用其均霑未及之
人宜加收用以伸公道以慰人心 上覽奏深用嘉
納悉付施行旣而代還掌道事牛玉得罪南京給事
中王徽等跡其悞事之因并及李賢忤旨調外君率
其同官上言徽等初心一忠愛所激而遽加斥逐之

天下之人將以爲不樂人言顧忌畏禍弊將不勝況
今日拭目維新之治而乃首斥言事之臣於太平盛
治不能無損雖未得報時論莫不避之君諱侃字廷
直姓白氏太原平定人曾大父德興大父勲洪武中
舉孝廉官至楚府審理正父琦有年德爲鄉耆老以
君貴封監察御史母石氏君景泰甲戌進士浙江道
御史應天等府及廣東兩巡按外又嘗巡視太倉督
捕中城賊盜巡理紫荆等邊關有勅書寶楮之賜超
陞陝西按察司副使以軍務邊儲往來延慶者再暮
竟卒於榆林邊人哭之如喪所生其爲人孝友忠信

家有寡嫂官下歲必寄衣家素饒每寄書誠其子弟
凡鄉人舉貸不必計利有無在太學號合偶得遺金
十兩詢其主而還之居官恒自誦曰公以處事私意
一毫無地入廉以持身誠心兩字有天知書粘私室
之壁去則揭之其自勵如此故所至有冰蘖聲

陝西按察司副使劉公瀚墓志銘 李東陽

公諱瀚約之其字別號樗菴先世本汴人宋南渡有
爲黃州統領者徙建康後有諱順者權茶平江路遂
居長洲高祖諱元善元季集義兵保障其鄉曾祖諱
德讓國初爲沛縣儒學教諭祖諱仲與贈中書舍人
考諱鉉累官翰林學士國子祭酒詹事府少詹事贈
禮部左侍郎以學行聞於時文恭其賜諡也公少爲
蘇州府學生景泰庚午領南畿鄉貢卒國子業有名
其舉進士在順天丁丑試政禮部領詔至楊州府府
餽金二錠公峻拒弗納列郡皆相戒勿餽縉紳繪却

金圖賦詩以頌之其爲大理在天順成化間職駸
慎嘗奉勅錄京畿及江西重獄平反四百餘人出厥
河間諸府饑民籍名給粟者十五萬其爲同知八年
專理戎籍多所釐正鄰郡懇訟者踵相沓爲知府得
專制鉏強抑暴民甚安之部使旌于朝章至八九上
爲副使益持憲體會邊徼多事督餉不乏資望日積
而述致事以去西安府餽金爲監邾之曰不聞致仕
與在任同邪時弘治己酉也居鄉十七年足不至公
室故鄉飲有司禮爲大賓其于生暇履孝義與人交
不自代與詞吏語精法比達政體善古文歌詩而終身
謂之和隱忍不置壽八十有一矣

何景明傳

喬世寧

何先生者信陽人也名景明字仲默號大復山人今
海內稱大復先生云生有異質穎記殊絕八歲時即
能賦詩爲文章諸老生見者爭傳誦稱爲神童年十
二以父仕臨洮府驛丞乃隨侍臨洮守李紀者聞其
奇召置門下甚愛幸賢之爲延師授春秋居頃之即
善說春秋歸又受尚書長兄景韶所誦數月即以尚
書魁河南省試當是時年財十五也諸王公大人爭
迎致一見候車常數十乘所過人觀者如堵旣入京
師遊太學祭酒林公又甚愛幸賢之歸則詩贈焉于

是名盛傳海內猶鳳鳴麟出世人驚覩也年十九登
壬戌進士授中書舍人是時北地李獻吉武功康德
涵鄒杜王敬夫廬下邊廷實皆好古文辭先生與論
文語合乃一意誦法古文而與獻吉又駿發齊名憂
情時事尚節義而鄙榮利並有國士之風焉往學士
爲文自六朝以後日益靡靡敝矣國初尚襲元習宣
正以來駸駸如宋矣至弘正間先生與諸君子始一
變趨古其文類國策史記詩類漢魏盛唐于是明興
詩文足起千載之衰而何李最爲大家今學士家稱
曰何李或稱曰李何屹然爲一代山斗云在中書時

自館閣諸縉紳與四方學士人人願見先生又願見
先生詩車馬填門巷不絕而先生德性醇明言儀雍
雅杯酒談笑間詩文立就作字復秀拔奇勁迥出常
格一時聲傾都下然顧高潔不妄交游錢寧欲交謹
先生間持古畫求先生題先生曰此名畫無汗吾題
留一年終不與題是時寧賜宗姓最寵貴弄權先生
顧奴視遠之會乾清官災應詔言便事乃極言邊軍
番僧義子數事義子者斥錢寧也疏留中不出師御
史客死京師權倖廖鵬者賄之棺謂可結縉紳謹也
先生曰御史生不苟受奚爲受汗地下邪乃約所知

其將金斂之竟却其棺後督學關中會鵬弟鸞鎮守
關中恃勢益橫諸叅隨者遇二司不下馬先生執叅
隨者撻于市責數之乃諸叅隨者始人人斂避矣先
是逆瑾撓吏部權則移書許太宰引正大義獻吉與
姜御史詰奏又移書楊太宰直獻吉獄少師李西涯
疏上乞休會有兵事又援古大臣義爲書讓之三書
皆非身事而抗言尊顯語涉時忌議者謂受國憐才
古人莫加也顧獨以不能干謁守中書十年不調官
然志在經術世務終不言功名事其督教關中士亦
以經術世務如其所自志關中士習文藝蓋自是一

大變云是時世寧侍先生正學書院先生說五經義
與諸家訓詁多殊私以爲諸訓詁不及也古天文地
理陰陽律曆家皆能究其指意常言彼有是有不是
欲取經訓與諸家書刪繁折衷成一家言顧三十九
而卒志業竟不及就也豈命數然邪抑詩文盡洩神
秘固造物所忌邪嗟乎嗟乎而志狀則言先生使滇
南不持滇南一物持父母喪不終禫則不酒不琴性
不喜華麗不治產祿入盡散親故臨卒時餘三十金
篋中此固世俗所難在先生猶其細者始先生崛起
汝南人卽以爲班固崔駰陸雲王勃之流也夫數子

皆幼慧英特才藻雄麗者故人以此先生至先生德
量風節數子又安可並論哉世多言修士少文才人
行劣二者益更相笑也乃先生則獨稱全才可不謂
振古豪傑士邪所著雍大記三十卷何子十二篇詩
歌千餘首書疏騷賦序記銘贊雜文數百篇盛傳當
世名可萬世不朽矣次子立舉癸卯鄉試立子洛文
復少俊皆能世其家學喬生曰世稱何先生詩至名
傳四夷不虛也其節行人不盡傳何哉及讀何子十
二篇又歎有王佐才而蚤死不過悲夫余故述先生
行事采其關國體大者令太史氏有可攷焉

陝西提學副使王鳳靈傳

王鳳靈字應時耕原人其先曰王發者依舅氏姓吳弘治中有御史吳玉榮卽鳳靈伯父也 毅皇帝十一年鳳靈偕兄鳳儀舉于鄉俱從吳姓明年丁丑鳳靈舉進士授刑部主事始疏復王姓云鳳靈生有異質日誦書數萬言輒終身弗忘爲文章以氣勝其起家比部郎年甫弱冠乃明習法理如老吏宦官張銳都督錢安等罪當死詔減戍且許贖金諸法吏咸愕然鳳靈獨疏論之其略曰此等非逆瑾爪牙則錢寧羽翼非交通宸濠則結好江彬蓋必誅之賊也今以

賄囑轉移 聖慮臣恐奸雄伺釁旨將謂私交可無
誅亂政可不殺而獄可賄鬻肆無忌憚天下之毒可
勝言哉疏奏竟如法司議給事中陳洸者罪有顯狀
世廟以議禮故庇之鳳靈疏言曰議禮者自議禮
犯罪者自犯罪何得援此以掩彼也臣聞 先朝開
國靖難及諸迎立元勳豈無寵利動觸刑章卽如議
禮諸臣深係 聖心而或處極盈之會犯不韙之科
陛下亦將與衆棄之而不得私如洸之罪又奚待
持不決之疑諸曹咸爲之悚然謂公言直如議禮諸
大臣何鳳靈毅弗顧自是無敢復庇洸者矣其練達

守法類如此年未三十出爲襄陽太守未幾以母喪
歸服闋補淮安淮稱劇郡風靈至視無難者問民所
疾苦清徭賦擊豪猾數十輩更創郡縣學又闢龍溪
書院廣徵屬邑士與肄校其文藝爲之筆削刻曰同
文錄又引淮水入汴以開科第之祥故其門人一時
登科第顯庸者甚多淮故患水鳳靈首疏五事以疏
泄重農爲先又因頻歲旱蝗連上秋災夏蝗等四疏
請蠲秋糧雜賦出餘鹽銀數千以賑民復疏停馬價
懇惻數千言俱得請民賴以甦嘗鑿淤河辨疑獄緝
治巨盜卽古稱廉明何加焉在淮五年擢陝西學憲

淮人卽龍溪書院爲生祠祀之未抵陝遭謗歸起補
蘄州兵備佐翟相行九邊又督城沙河議省費忤柄
事者故疏留五載始遷廣右大叅未赴忌者以考察
竟罷之鳳靈性伉直好激論天下事以此多忤人功
用惜未究也其文章名高于時所著有淮陽急稿及
諸奏疏字法王右軍人珍慕之今淮諸生稱曰筆峰
先生列循吏傳鳳儀亳州學正子一貫舉鄉試亞魁
海豐知縣

陝西按察司副使邵公蕃墓志銘

李本

吾邑以德行文學表見於時躋穹齡而裕後昆者東里邵公其一焉乙巳秋本視篆留院便道歸謁公公尚能儼然周旋爲本道親故不倦不意別未幾而公先逝矣豈惟我親故者之傷士類莫不嗟嘆云公諱蕃字文盛世家吾姚東隅族屬蕃衍先多顯達人父驪母韓氏公生而魁梧偉特有奇氣學步語時迥然不羣三歲失怙知悲哀事繼母潘氏能竭力孝道六七歲便日抱墳籍以爲學過目輒成誦是以學無所不通尤深於禮經年十二爲舉子業通三場聲名藉

藉以起老師宿儒莫能以校得失年十五督學張公
試諸生首取公入邑庠生自是每試必居首無能易
者成化癸卯舉於鄉明年甲辰登進士第知建平縣
建平婁而敝民甚凋瘵且訐訟滋漫緣以爲奸號難
理公至早作夜思務求安輯之道乃清以律已公以
御物有利罔不興有害罔不除衆瘼悉蠲羣情大洽
六年而政績顯著薦交上皆曰江南治行第一弘治
癸丑行取授山西道監察御史公益秉義奮忠毅然
有澄清之志矣於是巡醴長蘆則肅憲度搜蠹弊言
利歸於國商稱其便者莫加焉於是提學北畿則嚴

立規條崇文興行言公明兼至科第得人者莫加焉
戊午丁父憂辛酉起復補四川道是年又丁繼母憂
甲子起復補廣東道乙丑監會試所在踐職綜務厥
猷融茂丁卯陞陝西督學副使表正化導如在北畿
時查革民人冒名援例生員他邑補廩皆不避權貴
爲之逆瑾興平人絕與見銜之戊辰吏部推公擢四
川左叅政瑾從是疏中令致仕瑾被誅臺諫文章薦
公如巡按御史劉公天和都給事中張公璫皆以公
抗奸去國志烈秋霜宜叙秩時楊公一清爲冢宰以
公代以督學時頗更其事謂形吾失也衆疏竟寢不

復起用士論惜之公遽戶舉門一疏食飲水數十年
終日危坐一室間讀書談道之外一毫不與焉知與
不知者莫不嚮往之郡伯王臬張公敦請至郡爲鄉
飲大賓時年耄矣八邑之人多來觀者雖麟鳳之瑞
不是過也其佚之沮之者何在哉公孫淳嘉靖癸卯
以禮魁於鄉明年甲辰登進士第知六合縣政譽赫
然皆如公公得親見其後賢若此則天之報公者又
豈不多耶公生於景泰癸酉六月卒於嘉靖乙巳十
一月年九十三歲

陝西按察副使徐公聯墓志銘

顧珩

公徐氏名聯字成章長淮衛人其先本南豐人曾祖
旌始籍於衛父景春以功陞百戶進階武略將軍嫡
母李氏母高氏生公沉毅簡遠學詩補郡學生弘治
乙卯舉鄉試丙辰第進士言必法行必端不苟交接
爲衆嚴憚拜南京大理寺左評事明習法比獄多平
反嘗率同官刻罷刑曹舞智亂法者一時無敢高下
其手歷九載轉左寺副尋遷右寺正乙丑陞河南按
察僉事整理信陽兵備其地當四省交會多山谷盜
爲奸公靜鎮仁煦察見善惡不知難治以母喪去位

百姓遮泣郡縣致聘咸不受已巳服闋復授前職得
巨盜盜路鎮守太監廖堂求脫金執不變廖欲中以
他禍竟不得聞而止陞陝西布政司右叅議時吏部
尚書張綏當權有欲爲營私第者假官政檄取帑積
公擲地不從陞按察副使理肅州兵備適有邊警乃
置家口於鞏昌單騎戢戎捐授方略虜不敢近由是
謹斥堠厚犒備精簡閱軍聲大振乃禁諸將侵漁及
絕入貢哈密土魯番諸夷私覲內外帖服方經畫遠
圖辛未得瘖疾遂乞致仕清修苦節視平時加峻居
五年卒于家蓋正德乙亥九月九日也年五十有七

公爲人孝友忠信篤厚倫理喪嫡母毀瘠如喪武略
公時少受學從兄訓導公海終身師事維謹同母兄
繼以誼誤戕威遠公遇於逆旅畢力贖護攜其子女
赴官教育之及請老歸復遜故居與兄友愛益篤寡
嗜好仕宦垂二十年圖書之外無長物每去任凡有
司器什必按籍檢還信陽嘗有小器貯藥出藥還之
爲文有典則晚益深造非御公牘手不釋卷所著有
長齋稿若干卷藏于家

陝西按察司副使唐公希介墓志銘 徐緝

公諱希介字景賢世爲太原之陽曲人景泰甲戌正月十有六日公生而穎悟絕倫三歲知字五歲知書十歲知爲經義一時稱奇童云遊中丞貞菴陳公之門肆力探寔志在遠大不以程業拘也未冠補郡學生試輒高等庚子舉於鄉爲易魁丁未擢進士選授翰林庶吉士三年改工科給事中隨事建明直聲大振久之特拔簡命稽省真定等四鎮儲備公躬親閱實盡得宿弊以聞於是權倖見嫉以他事中公謫四川石柱宣撫司經歷萬里遠宦怡然就道旣蒞任承

徽習仁壽雙流二邑公不鄙夷其民植善錫惡俗用
丕變又檄視州茶政廉發私隱黠吏枕塊稍遷漢陰
縣令縣有鉅猾杜某作姦犯法持吏短長所居窟穴
湍阻捕吏莫敢蹤跡公密設方略擒而斃之繕完城
郭百廢具興再遷知揚之通州州臨海有漁蒲鹽泊
之利盜劫出沒司徵巡者歲入其賄陽翁陰縱民賈
交病公至揭賞購示以威信盜望風散逸境內獲安
河堤濱決撫巡檄公董治公內籌規畫外別勤惰旬
月之間嘉績亟成庚申擢陝西按察司僉事督餉榆
林邊吏有乾沒稽緩者公糾慝繩違軍餉不乏邊氓

有爭田久訟者公兩室其侵怨仇立解時大學士石
淙楊公總制邊務議增置茶市以贖軍賦公條答便
宜二十三事石淙公并施行之且貽書以謝其欽重
公如此未幾改四川僉事尋擢陝西按察司副使槍
林兵備仍兼督餉公愛養士卒約束裨校戎乘肅睦
邊威赫然軍府多贏積中官欲私取公執不可謹藉
以俟詔發中官銜之構諸逆瑾璫矯制逮公三木長
安市長子淇擊登聞鼓訴冤罰輸居庸米三百石復
其官璫猶覲公往謝公堅執不往乃嗾御史劾公不
勝邊防重寄有詔著致仕公天性高朝每懸幸目警

然剛腸直氣數忤權奸禍且叵測而能屢折不撓完
潔去就可以觀其人矣惜乎宏才碩學未究厥施而
官簿偃蹇竟止於是不亦道消之遘然乎晚節公事
撝斂杜門掃軌娛意篇籍自奉儉素不隨俗華靡朝
夕程課諸孫親爲講解暇日則賦詩著文頗見已志
有石菴小稿藏於家非公會未嘗入州府雖姻黨戚
屬不輕造就清介之操老而彌劭優游桑梓越三十
年春秋八十有五諸孫繼起科第食天之報大耋令
終如公者可謂無憾矣

副使章公袞墓志銘

陳九川

君諱袞字汝明別號介菴君幼穎異不羣雖長治舉業爲庠生然志以古賢豪自待早失怙恃家甚貧而苦節危行恭其兄而友弟甚至常病俗儒不知經術剽竊爲詞藻耳故博學精思期以致用旁究釋典了其大意嘉靖改元以詩魁鄉薦明年舉進士出身選試山東道監察御史久之實授累疏論時政効長吏卽卓然有直聲然君猶往往追悔以爲逐時沽名謀國之忠未純也四年巡覈四川貴州軍餉事竣東還得告八年卽其家起督南直隸學政君旣拜簡命益

自淬濯以立師道不作樹桃李念先德行而後文藝
進退多士一無所徇士習爲之一變於是聲聞日弘
十年廷議削夫子王祀君力諍之不可出爲福建建
寧府推官得謁練氏夫人墓四載遷松江府同知
良莠奸二郡人至今稱之十五年入爲南京職方員
外郎尋晉武庫郎中十七年改考功郎中司南京考
察有御史怙勢貪殘張甚首黜之遂倚時宰誣奏欲
中公以報怨而公論方偉君不可奪乃寢十九年冬
得陝西之命君嘆曰吾老矣隨行折腰仰面以事人
且必重得禍不欲就其兄固強之乃行期蒞任後卽

從初志及秋會虜深入山西君當署潼關兵備憮然
曰誰未可去也卽出繕城堡整甲兵日忘其勞爲戰
守備秋寇退而代者至乃以疾白兩臺以聞卽日擢
孥出關吏部移文留之不及宰執有銜君者因削爲
民二十四年恩詔始復冠帶當路交薦卒亦不用君
性澹泊又以親不逮養平居食不重味恒以儉素飭
其子居鄉嚴謹人不敢干以私至關國風民利未嘗
不剴言竭力生平不習家事而手不釋卷其爲詩文
馳鍊琢蹈襲自成一家所著有學庸口義隨筆瑣言
古文筆札若干卷

陝西按察司副使劉公從學行狀

公諱從學字時敏別號屏山生有異質方解語卽好誦書不與羣兒作俗戲成童隨先大父之金縣俸資且廉薄公竭力奉甘旨而自不厭粗糲暇則日誦千餘言先大父奇之始教之作文卽領大意後先大父謝政歸田適督學濯菴馮公會考公爲首遂登正德丁卯鄉薦試禮闈弗捷業大學已卯秋銓兵部司務公嚴以督責羣吏勤以註誦公文嘉靖甲申適廷臣議大禮各疏力爭公奏曰義隆正統情盡本生頒之詔令 聖心亦旣慰矣奈何欲去本生之稱非先王

之懼者後世之議豈不爲聖德累乎奏入留中公復
奏曰本生二字何違於禮何損於孝去此二字則援
立之恩繼統之義泯而無存矣奏入復留中朝罷
上齋居文華殿金獻民徐文華倡言於衆曰昨諸疏
留中必欲改稱孝宗爲皇伯考則大廟無考正統
有間矣何孟春曰憲宗朝禮部尚書姚燾率百官
赴文華門跪哭爭論慈懿皇太后葬禮憲宗從
焉此國家故事公倡言於衆曰國家養士百五十年
以節死義正在今日乃遮留諸朝臣於金水橋南曰
萬世瞻仰在此一舉今日有不力爭者當共擊之俱

赴左順門跪伏聲徹於內 上命司禮監官諭之曰

此禮 朝廷自有審處羣臣咸曰必得俞旨乃退及

午撼門大哭聲震闕廷 上大怒械繫而廷笞之丙

戌春陞戶部員外郎行查京庫及九門錢鈔時與內

官同事公守已清慎執法不撓吏部考績曰才識宏

深性質謹厚閱歷寢深聲稱愈著丁亥春陞郎中奉

勅總督遼東糧儲關防慎密餘銀分毫必記於官一

時官遼陽者如張公問行陸公杰麻公循咸服其老

成戊子冬奉旨九年考績赴部己丑春復補廣東司

庫中庚寅冬得給誥命辛卯乃奉恩旨焚黃祭墓壬

辰陞陝西布政司叅議分守隴西道及過先大父舊
治金邑父老擁留之隴爲邊郡地瘠民貧公澹薄自
甘束薪粒米不取於民州縣官不得以私謁伸冤理
枉付之公道俸入之外取一錢規矩之外行一事斷
乎不爲也臨華地方大虜壓境犯邊攻墩公督率官
軍勦斬獲首級奪獲達馬夷器奏聞 上嘉之賞銀
十兩紵絲一表裏時嘉靖戊戌也華昌府同知李選
口稟站價銀五十兩送本道公用公叱之曰 朝廷
錢糧自當作正支銷卽時付府守冠子天與作正支
銷訖丁酉歲轉按察司副使奉勅整飭甘肅兵備抵

任豪橫斂跡邊境安堵不逾載有歸念移檄撫按公
遂浩然而歸官軍哭號遮道至不得行時閑住叅將
芮綱餽贐五十金公令千戶楊錦却之視四品之秩
不以爲貴二千石之祿不以爲富棄歸林泉飲水甘
於列鼎縕袍榮於華袞旣抵家山林寄傲不邇公門
終始完名無少玷缺嘉靖甲子仲秋偶感疾卒壽八
十有二云

陝西按察副使葛君覃墓志銘

語曰長算屈於短日嗟乎功必次而弘時才必久而
累績故人直多艱靡拒天損古志士深悲之吾磁葛
廷之父操廉蹈勤約已奉國而官副使年五旬卒已
失其抗志踐古展蘊立名期而勵者將若何而極也
磁又有御史王泮忠清乃廷之伍亦早死悲夫吾鄰
生尤丁天損之虛邪廷之諱覃祖玘父義母王氏嘗
封郎中及太宜人廷之明朱詩正德甲戌舉進士令
樂清三遷官至南京戶部郎中守平陽乃憲陝西廷
之有治才理簿書詰囚要精明立可辦吏不得爲奸

在樂清堪輿家言建署背吉地故令無遷官者宜改
治延之不從減武官濫役民遭其構不動在平陽辟
盧生又辯其屬之誣皆忤上官蓋其操廉無可指瑕
故遇事斤斤執典天性簡言笑交遊每日兢兢律身
恐越繩墨論者謂宜濟之弘裕然循其習性無變配
張氏亦封宜人五子逢春逢夏逢吉逢時逢辰一女
嫁張涵延之以嘉靖甲午九月二十三日卒生于成
化壬寅正月十四日逢夏爲郡學生著名塲屋間將
以乙未十月望葬其父余受託銘墓乃法先漢賢士
文體簡存要略且綴鄭康成銘曰彼庫揆機乃材夏屋
句短較者大服四馬爲生夜獲甫授伊廓而返冥冥
時堅已約往恤人喪而聞讙聲而不截截而詞揭揭
永登白潔

陝西按察司副使劉公效祖墓志銘 正一號

劉憲使名效祖字仲修別號念菴其先出山東濱州
始祖四當文廟時徙實都下占籍武驤左衛生八公
八公生能能生二子長通次達達以明經爲御史大
夫通生寓卽封君娶於彭生三子公其伯子也在極
樛卽喜弄圖書御史大夫諱之勝下早善屬文年十
二彭見背哀毀如成人禮十六補博士弟子員嘉靖
庚子領順天鄉荐時年甫十九已而御史大夫歿家
中落公養封君志盡菽水歡又能周旋於二從父間
封君疾日夜侍湯藥願夫願代封君不起哭幾絕人

以孝稱庚戌登進士第出理衛輝故事司理以風聞
應直指其事之真屬輕重不問公察舉一二豪猾及
事之重且大者鞠報稱文無害嘗謂擊賣菜傭爲風
裁不爲也延津周氏某冤罹大辟竟白之其所平反
無算攝郡事釐奸剔蠹惟民便暇則進諸生談藝得
其教以進取者翩翩焉今東鹿尹趙君詰才而貧館
穀婚配皆爲之給祥符丞王某以病請骸骨爲具棺
斂以舟護歸其家磁州牧周某有墨聲恐洩夜懷金
遺之則遜謝去後復以私篋竄行李中旣露則密馳
以還以是中丞直指刻荐纍纍侍御浦公之詰更以

人望推轂之癸丑應內召乃柄臣有銜杜金吾者知
公爲杜倩恐入臺省有左右袒陰阻之浦侍御力言
之始授戶部廣東司主事卽視九門未幾奉璽書易
粟梁趙間輦之督亢備雲谷緩急事將竣又勅督所
歷逋負則次第催科商民便之丙辰報最封父如其
官母贈安人已而督漕天津戊午陞廣西司員外郎
旋陞雲南司郎中職市金珠爲內供時上用主豐
臺省建自主儉公籌盈濟虛權可剔否大司徒據之
以請如調劑然比歲烽火無警各營草日腐累商公
議散之諸營而見貯者給商以直人人誦便蘭州度

支蘇郎中以不預支倉儲被誣勅公爲雪之蘇得無恙以故大司徒楚中方公國中馬公咸亟稱之清苑高公以諸司事盡委視草分宜父子每見其疏私重之欲羅之入幕乃婉爲謝遂陞陝西固原兵備副使行不入辭別不具饋固原於平涼岡寺地夫步武岡卿某有內授日庇牧卒如私人卒每縱橫有問者輒撼以危言公不爲意徑執之置于法郭公宗臯謫戍原州請間一歸葬母諸大夫但佯應公大言曰戍者以失柄臣心吾儕可錮人以媚人乎況累臣非埒大僂且也以親國歸何失孝子心第歸我卽罹譴勿恤

中丞裴公行塞歷平涼朝王就席次以通祿請裴公
難之既罷遂誣以舉爵壽王緩屬不敬欲上其罪公
聞之乃曰嘉禮有注責在藩相所不預具焉用彼
當先繫璫矧王以糧故於杯酒責望如國體何璫
塞旣而諸王係遮道以挾則請姑面允去裴又否
否諸王孫問公責以危言身護裴以行王與諸王孫
乃知朝廷紀綱森然如此一日虜忽闌入花馬池
城下元戎提兵出無乘城者公先登鼓諸老稚備
矢石虜覘有備竟解去城以完癸亥大計爲忌者
所中當東歸原人扶老攜幼號泣車前者聲震四
十里歸則則

日涉園日日陶情觴咏間少醺作樂府數闕擊節歌
之乃肆力修詞大業與海內詞客或結社或飛筒授
東爲詞林盛會諸大夫或就而問政多所指畫語不
及私會王大成變有欲以奇禍中素隙者事屬白金
吾曰諸決策則握手示曰族人徇人毋論非丈夫所
爲如冥冥何第訊罪人自得其情白如其言大成伏
辜幾中考得無恙京兆大梁曹公念京畿首善地關
專誌欲徵載筆督府北海劉公以薊門邊乘先聘之
因而如檀州作關鎮志凡三閱歲以是得縱遊諸塞
上所至輒有紀公一日聞主上問其姓名因賦詩

志感曰更生雙鬢已蕭騷敢謂文章掇彩毫過誤偶
承明主問因緣不是鬱輪袍萬曆己丑二月卒距
生嘉靖壬午七月年六十有八著述有四鎮三關志
十二卷春秋窻稿二卷劉仲修先生詩集若干卷文
昔千卷塞上言一卷盛世宣威清時行樂二卷燈市
謠長門詞二卷雲林和稿空中語短柱效顰閑中一
笑裁冰剪雪都邑繁華蓮步新聲共七卷行於世

陝西副使黃公卷傳

耿定向

黃憲副公卷初官比部出補山西僉憲晉陝西少參
已晉憲副卽解綬歸歸年才四十有五耳公歸蓋卽
真明農云春夏間家衆悉驅之田作而獨與其配操
杵曰炊釜作飲食躬荷而饁之嘗假農具鄰舍鄰舍
子欲昇送之公曰母此何時也假我具卽德厚矣奈
何又妨汝務遂自肩之如田焉公性故孤介惻樸而
逸興甚豪雅嬰情山水間山嶠水渙靡不遊至或乘
敝輿或策款段或曳杖蹒跚脩然咏嘯飄飄若仙焉
家去城邑四十里而近經歲不一至至則市童撫掌

歡呼相指曰黃公來也蓋識其與敵陋云公居常好客容至座已徐起臨庖服膺鼻衣治具具無兼味治畢乃盥手更衣出卽新端上客率以爲常余一日偕周元孚進士候公公歡甚縱談名理因及疆場事奮然有請纓之志移日不輟已有婢從屏間稟曰烹雞熟矣請剖公曰少需蓋劇談方適無間也有頃婢曰如初公又曰少需如是者三而公談益劇乃命婢曰汝姑自剖旣共饌出截肋狼籍不爲意也公間起入室余從之闕其室一榻蕭然不啻僧舍已余時若冷然噓以清風酒然沃以瓊漿也退謂元孚曰吾與子

今幸游義皇世矣相與嗟嘆不置云耿子曰夫世續
其躬爲苦節行者類多離齷迂滯不能事事彼蓋矯
飾爲名高者也其真漓其性狃矣公率性之真從心
之安孟子所謂人有不爲可與有爲者非乎藉令世
誠重用之饋纓之志計能償之不虛也余又嘗聞里
中前輩若鄭劉周李董阮諸公其風軌大都如是顧
所及覩記者惟公因憶父老相傳宣正成弘間里中
民物殷盛間蕃熙熙有以也乃今里中身有完服而
無菜色父子兄弟相聚而無愁嘆聲者蓋鮮曷故哉
吏治之日斡也吏治之日斡則士節之不立也士節

之不立則古禮之浸微而紛華之爲節甚也卽吾一
鄉而天下可類知已嗟嗟孰謂公履爲細謹哉公蓋
古道之碩果矣余茲重有慨焉爰拾公一二沒事爲
外傳云

陝西按察副使梁公承學墓志銘

于慎行

梁公諱承學字師顏東郡名家也其上世居冀洪武
中有士成者古籍爲聊城人士成生無爲知州棟棟
二子智能智生舉人璉能生南京戶部主事璽璽生
新城知縣相是爲公父其後以公貴再贈奉直大夫
戶部員外郎初配李氏生承祖繼配王氏生公其後
皆贈宜人公生有殊質六歲而孤家又貧獨從母宜
人居攻苦誦習髫年學成楊襄毅公校士東郡才之
嘉靖己酉方十有八歲以易舉山東省試聲動齊魯
間其後數上春官數罷益發憤不少沮竟以隆慶戊

辰成進士有同姓中官方貴用事請與序族公正色
曰吾誠不知系所從出顧安得妄附人以邀寵澤謝
弗與通座主少保殷公問而重之除陝西延安府推
官公雅精法家指然其讞獄以平恕得情不欲核刻
搏擊取小治辦爲名一日閤獄中囚有八歲小兒投
石戲誤中七歲兒斃吏增兒年論死公廉其狀立貴
之府中卒出顧金錢照磨笞卒卒後病死吏當故勘
平人律公曰卒爲奸利非平人照磨笞之固當奈何
中法亦減死論他所平反如此類尤衆至品第郡邑
吏賢不肖狀無不精當而大指取寬厚不求人細過

居秦中滿考奏荐十有三疏計且召入而柄銓大臣
故嘗撫陝有所嘆於公乃擢爲南京工部主事時論
屈之在南曹時嘗疏瓜儀河道理沿江蘆課咸有能
名後以修孝陵工加俸一級滿考奏績改戶部廣西
司九江權稅序當遣公郎中有所善欲往以公改北
爲新任不當遣同曹咸爲不平公曰使職等耳何必
九江竟無一語已而所遣者以墨敗人益服公嘗司
庾天津出納平慎進山西司員外郎再進浙江司郎
中改雲南司雲南司者專主漕政於子部爲劇司徒
擇而得公公握籌推會區畫劑量悉中肯綮督倉儲

書欲扣漕舟盤剝之費奏爲羨餘運卒聞而大譟
書恐夜召公公具陳不可狀爲草疏平亭之秦下
卒乃安言者疏倉曹郎使竣令御史核殿最下戶
議諸郎愕莫能對公奮言曰郎御史各以職奉使相
頡頏郎卽不稱使大司徒在是何與御史竟寢其議
先是議者以江北田荒奏遣憲臣一人督吏民開墾
三年命公往視狀公馳至其地徧覆穀土荒墾民人
流亡具得其實以報甚稱上旨然亦陰取忌矣故事
郎秩八年以往當陞叅政公平平生澹於進趨無所內
交主爵以爲才任治邊徼陝西按察司副使備兵鄆

延公夷然不爲意再至塞上日夜按行所部繕治城
堡修飭武備西邊大治嘗以丈田奏荐詔主爵志其
名又嘗以開邊勞受金幣賜犂稱大振宜君獮賊嘯
聚撫臣欲發兵捕公謂此皆凶歲饑寒救死不足以
屈軍吏不見嶺南蚤夷事耶遣郡邑丞尉持檄往諭
之賊感泣立解散撫臣意沮會其年關中大侵至人
相食公設法振貸多所全活而爲忌者所構反以爲
救荒無狀有詔改用公因拂衣東歸遲回不欲出久
之故人多趣公北上乃裝詣闕行至武城而病亟返
舟抵舍數日卒萬曆丙戌二月距生嘉靖壬辰三月

得年五十五歲公爲人潤達有度重厚簡朴不爲小
文天性孝友內行甚修事兄及寡姊恩禮備至於族
人親戚多所瞻給交遊無間窮達緩急賴之有長者
解于生曰江北故鮮大族如梁公五世科第爲吏可
指數耳然一聞其家蕭然如諸生大父以來田廬無
所益稱清白吏子孫矣治獄多平反以尺檄解嚴劇
盜仁人之利博焉綏輯諱卒出於頃刻若正言御史
郎吏之職抗慨引義懦夫動色斯已壯矣予觀公諸
子皆質樸有文昌大其家不可涯濫用其所不足於
後世天遠耶

陝西按察司副使沈先生啓原行狀 潘國集

嘉靖甲子比士 上用言官議兩畿分校選京秩有
學行者充之於是霓川沈先生以南屯部郎校尚書
得十有三人不佞某亦幸與焉異日宜猶著績爲時
名流者項背相望人以是多先生之鑒獨不佞脉脉
靡所樹先生開發成就之始終備至蓋二十有五年
如一日也昨某濫竽一第先生色喜貽書鐫勉卽某
淺薄不能副期待之百一庶藉模楷以自免於訾戾
而先生逝矣嗚呼痛可言哉先生弟啓南將相兩孫
葬先生嘉善思賢里祖塋之次以世系生卒行事屬

小子布狀將圖所以紀諸幽者小子則曷敢辭先生
諱啓原字道初別號覓川其先汴人宋南渡遷會稽
洪武中始祖庭芝自會稽徙松江遷善鄉宜德中以
遷善鄉隸嘉善遂爲嘉善縣人庭芝生璣字子厚始
贅居秀水之長溪子厚生璿璿生淵淵生度世以孝
弟力田起家度生東園公復是爲先生大父用子貴
封徵事郎刑科給事中東園公生石雲公謚卽先生
考舉嘉靖己丑進士由行人授給事中仕終湖廣參
議石雲公配盛氏贈孺人繼盛氏封孺人是爲先生
母後並以先生南書郎考績石雲公加贈朝議大夫

繼配盛孺人亦晉封恭人初石雲公數艱子久之始
舉先生先生生而奇偉當庚寅年五歲會石雲公奉
使代藩事竣還京留先生侍東園公子家臥起唯諾
有成人度東園公甚喜之及石雲公轉山東僉憲歸
則先生年十二學日就緒自是更延高等博士弟子
教之如一山王公文湖盛公皆先後受業歲庚子督
學蒙溪張公校士得先生大爲稱賞以儒士應試省
闈歸而補邑諸生益折節好學復集郡中時髦爲會
于水東別業及文湖書院乃丙午舉于鄉年財二十
有一也丁未庚戌癸丑三下第歸五七年門佐石雲

公治大母喪及公家遊江右所爲攝理家政井井兼
暇日則經史諸家大肆觀覽至于麟經則有集解屬
班則有集覽卽堪輿醫卜諸書靡不尋其宗趣父子
家人自相師友所考究必詳且至蓋先生性敏志篤
功夫深密宜其博而有要也癸丑石雲公自江右歸
卒于家甲寅東園公亦逝先生喪葬事事致於禮會
後亂暴起以軍興加賦閭里騷然督撫公破會徐海
等于平湖奏捷還郡城文武將吏暨召募土著之兵
皆在餉廩行糧日費二百金不貲縣令念閭里空乏
盡扣羨餘以佐之不五日告竭先生偶以他事謂令

與語令忽忽仰屋深念先生曰公何念之深也令曰
非他時文武大臣及募調諸兵在念有能具五日費
則某之責可追已先生立曰原當任之令躍起拜先
生亦拜卽夜歸率幹僕數人持千金畀之問者以爲
難初徐海未禽連歲剽掠嘉湖蘇松間先生倚膂力
販徒散以飛舸日圍聚長湖大溪中躬指授進退之
法重償其直而諸販徒亦自感奮一日倭果操兩巨
艦由平望入鄉而南近家不一里遇飛舸從傍夾擊
之因迤邐北遯至晚先生大犒之領鄉之親友曰吾
以此舟得免一鄉害較所費孰多此舉也始以圍聚

而脫優奴之禍又以脫禍而收服徒之心知者自是服先生才可以大受也已未成進士廷對策文詞古雅指法工緻咸謂上第不忝及發卷閣部大臣果遺報一甲第三人矣會以他故移置二甲十七名故事十七名者爲選首於法得北曹郎以前一人欲爲選首過先生曰使若以序次必首選予得州守矣幸若安之毋難予先生曰選之先後例也予豈有所謂哉予固不敢以君之過而爭亦不敢以君之過而讓嘗聽其自至及期前一人果挾分宜執下銓部時冢宰遂駕言以親知故爲先生嫌而欲首前一人選司王

力言于冢宰曰因親知而印之不可因親知而抑之亦不可執不肯首前一人卒並授南曹而先生爲屯部郎先生怡然曰南北等耳況予性簡澹南曹甚宜我庚申蒞任值分司儀真者爲臺中劾去大司空康公曰是役也非沈郎不可先生抵真州大反前政於開時其啓閉於舟疏其往來於椿輕其陪罰於商任其通販於買免其徵繇而浙直白船例不得由閩先生具呈大司空弛其禁瓜儀里老甲戶至肖形戶視之蓋所攝僅四旬耳會新任者代遂歸董蘆政政差奉旨有勅印其體視臺中乃前是者自爲貶損故

舉行者後而豪民占洲塲負稅課不可勝計金錢累
鉅萬積逋至三十年先生一拜命立請所轄申明職
事而又上請大司空曰奈何上下欺蔽第以國家利
爲奸豪彙資也宜具奏移文撫按嚴督各屬于是人
人知先生意旨遵守並謹追徵補解月不下數千計
前未有如先生之多而體貌亦未有如先生之重者
癸亥轉本司郎中尋考績得贈考妣加制而其配錢
亦封安人乙丑調南儀制司金陵多佳山水甚置綺
錯而禮曹又清暇先生率二三同志于燕磯棲霞間
宣賦詩婆娑甚適人見以爲悠然送日而先生之

韻度遠矣丙寅冬遷四川參議明年丁卯奉盛恭人
行抵蜀所館爲川南道時天全土官高定楊時譽相
讐殺當事者莫知爲計先生至移檄諭之其中宣揚
朝廷之威德追述先代之功勞鼓舞世傳之忠順究
竟起釁之緒端諄諄數千言示以禍福利害令其改
圖二家感悟謂先生不卽奏勦而拳拳諭解使我輩
如前搏噬能免禽滅哉於是鈐束部吏解散黨與一
聽先生約束而邊民臥始帖席矣他如申鄉約嚴保
甲慎巡警禁私渡行之內地者人咸稱便而豁鹽井
續增之課銀定番僧賞犒之限制尤爲無窮利云皆

所陳公實所嚴公檄蜀兩列薦剡謂大用可指日竣
也歲已巳以盛恭人卒于雅州官舍扶柩歸某弔之
江許先生涕泣交頤令余不忍舉首眎以別癸酉服
闋適子邠領鄉薦北上先生偕之甲戌補山東叅議
其分道在濟南而省政之當議者有稅糧牧馬二事
先生甫至議稅糧徵解自有成規而郡縣所行不一
有照舊總收僉大戶分解者有分倉徵收經收人領
解者有各里自收大戶類解者有總立櫃頭各戶自
投納者非畫一規擬總收之銀差佐貳首領類解郡
中卽以羨餘充道里費其解銀大戶盡裁之止米麥

仍僉大戶收解而催督責之里排監收屬之大戶課
櫃設之公堂種種悉爲經畫議上撫臺著爲令而吏
書之弊竇塞小民之陪累減一省皆受惠矣牧馬之
役濟兗東三府獨當之而青登萊無與先生閑其不
均酌令彼此通融以疏民困議上馬院亦爲令丙子
秋遷陝西按察副使治關南當四通之達驛傳爲累
錢糧不支會撫臺董公下先生議先生歷考道路之
衝僻供應之繁簡至馬驢夫役一一斟酌至今遵其
例行之丁丑子邠成進士上又試進士之杰者令
讀中秘書邠得首擢先生聞報嘆曰夫子家世耕讀

有何修爲而受國恩乃三世哉吾共歸矣適撫臺委
勘城垣弗果行先生詣各州縣躬閱略陽鳳縣褒城
因其地形量爲修築三城悉爲巖邑先生力也十月
按院巡金州守道缺先生并署篆遂赴金州不五日
撫臺亦於是時巡鳳縣金州去鳳縣爲里二千而遙
度不能兩詣乃以揭迎之撫臺謂爲慢已因以他語
中先生奏旣上先生翩然登舟無幾微見顏面歸塗
泛洞庭登太和每於山川名勝輒低回留不能去曰
吾少不能爲少文之遊幸所歷多名山足償吾願歸
而自岷峨秦華主人識西蜀東山陝右也比抵家

奉旨調用當事以先生清望久著輒議補先生先生
徐念曰夫人生之樂在曠然全其天真吾自登第抑
首者二十年茲得寬假又何能以七尺軀僕僕爲人
類卽耶且機穽已蹈尚不覺悟將令溪上之鷗笑人
也遂絕口不談世事亦不復通謁貴顯惟日相羊長
溪之上芟葺先人林園誅茅治屋爲偃息計爲堂有
與閒存石爲閣有柴芝闢風爲齋有止觀徐于爲臺
有紫雲香雪爲亭有蒼玉點易栽花種竹野服葛巾
親朋來往如山人而已性澹朴無所芬華飲食之奉
雖精潔未嘗過豐見富室窮水陸之珍必曰古人飲

不過三爵食不過五鼎陶然醺洽矣何乃暴殄至此
哉被服鮮整然非紉濯數四不更至于繕築棟梁棧
題至竹頭木屑經紀毛密斧斤無剩材布算無遺策
卽匠石氏心計不如也或有以逐十一之說進者則
閉目橫手曰與其恃人而濫費孰若節費而寡管辭
受取予無大小壹烹于義有請托輒遜謝之脫克抑
不白毅然爲之申理雖動造物議不惜也聞人善極
力播揚不善必隱之有以實叩者則曰經目之事猶
有未真況捉影捕風者吾敢信乎六人交無所不容
始或以他事見欺旣而敗露先生知之如弗聞也者

弟啓南少而孤先生愛之甚置臥內與同課誦至漏
下三四鼓不勸族多窘先是東園公置義田若干爲
昏喪資先生復以其餘歲莫人給之每歲租入率約
十之二三貧交疎昆弟人人得所欲以去故當被疾
日無貴賤大小爭趨祈禱願以身代所在祠廟肩摩
踵接至屬續後弔者無不泣且悲焉平生珍玩貨殖
聲色狗馬略不屑意而所篤好惟圖籍上自金匱石
室之藏以至古今集悉購無遺或少缺略借之儲書
家務繕寫完好乃已舊有萬書樓三楹爲石雲公藏
書處至是所積滋多復爲樓貯之名曰芳潤淨几明

意悠然翻閱手不停披寢食俱廢雖樂收藏不拘拘
宋元舊刻惟求紙版精明足供披覽人有惠先生書
者啓封忻然卽百朋不啻也平居不耐酬應或談經
史評法書而聞人持刺以進蓋未啓絨眉爲之橫矣
卽當路諸公多門生故吏先生絕跡不入城不投謁
然當路推轂人才必引以爲重先生顧視之泊如也
所爲詩冲澹夷曠氣韻和平一字不受中夜推敲務
求是當文則疏暢縝密詞足發意所謂仁義之人其
言諒如也蓋庶幾近之所著有詩文二集公移雜著
藏於家先生爲人儉約自飭而販窮則乏雖多無所

各接人溫溫而義有不當輒毅然不可回奪平居嘖
嘖似不能言而上下古今評隲經史如倒囊出物愈
出而愈不可竭獨其用未盡酬於世而其文章議論
又未施於郊廟朝廷第爲士民間里所歌誦其所歌
誦者不過以爲有惠政與篤行爲君子長者之遺風
而已未能信其可大用者爲何如也嗟乎使先生調
官時迴翔不去居家不堅臥不起必能致通顯有當
世事功然先生去之決不起之堅皆有深意其出處
去就靡不當於義而斷之以勇豈苟然哉凡材敏者
類能馳騁乎事功而非負學術者其出處去就未必

當於義先生得其難而易者可知已小子於諸門人
荷知特深握手深語進以爲可教願於先生之歿未
能奔哭以少效執紼之役惟是講聞事行最深且久
敢謀諸先生之弟撥拾大略次序如右以自附於門
人小子之誼俟銘先生之墓者擇焉先生生嘉靖丙
戌正月十有二日卒萬曆辛卯三月二十有四日享
年六十有六配恭人錢氏子一自卯丁丑進士翰林
院修撰先先生二年卒

陝西按察司副使梁策傳

陝西按察司副使梁策河間鄆陵人性至孝七歲母病將不起旦夕焚香泣中庭請以身代持香謁城隍廟伏地涕泣幾絕一黃冠授藥一莖僅寸許曰煎湯服之服卽旋已亦不知爲何藥人謂孝感致然時稱孝童就外傳手孝經不釋嘗口政本在此居官者當置一卷於座右何國家設科不用此也慕黃香之爲人習溫被扇枕稍長法曾子奉親百凡先意承順常若不足十七齒鄉校二十四籍鄉書孝聲藉甚行部使者往往移檄書物色抗辭逃避三十四中嘉靖乙

丑進士居都下心脉脉不肯拜官封郎中切戒始授
工部管繕司主事歷員外郎中居郎署十年三請告
省親留封宜人侍養未嘗以隨陞四川成都知府嘆
曰我必不能叱馭如王陽矣抵家蒲伏封郎中前號
泣以請封郎中大怒曰盡力王事非孝乎爾好孝經
不憶始於事親終於事君耶猶伏地不起舉杖欲擊
方起而戒途抵成都數月而大計計畢疏請終養時
封郎中封宜人年皆七十躬調甘脆未嘗任侍兒一
茶一湯必跪進徹則必請封郎中老益好遊日遊於
所知之家寒暑不廢每至漏下數十刻秉燭坐待闌

人報至趨門迎掖入寢室候寢定而退質明盥沐至
寢門問侍婢安否安則喜稍不安節憂惶廢食衣不
解帶人言修虔太和山可致親壽徒步往十步一下
拜下有餘里不知勞二人壽並八十封宜人歿哀毀
如禮既葬日廬墓側墓歸侍封郎中封郎中病脾不
能離衽席調飲食跪榻下手舉匕筯以進膾炙衣躬
視澣濯如此者年餘時季子歿配封宜人無祿皆不
問封郎中歿既合葬廬墓側日以筐承土首戴加墓
有慈烏數百集廬下筐舉卽飛而前導馴擾依人服
闋不能去墓所縉紳先生曰如禮制何再拜泣而微

廬嘗夢一緋衣幘頭人呼曰梁孝子我厚漢肇祀葬
我葬我詰旦園丁刷地得石果肇祀墓爲文祭而葬
之初成進士部送遼左軍餉故事餉無如額者此餉
獨如額遂軍懽聲動地主帥盛筵再拜曰近世所僅
有也營膳部董大工往年錢穀盡中官處分闕出無
算乃一切禁革大忤中官日聞中傷之陰伺無所得
改度支郎督維揚餉裁革一切冗費揚人感嘆不容
口晉郎中大工成敘功當陞尙寶以中官中之陞知
府親終當補官有司具徒徭不行直指黃縣林豫章
周中丞新邵吳文章列孝行以聞詔補山東登州府

時倭夷蹂朝鮮登州戒嚴南兵三千戍守白督府曰
是卒羈旅也瀕海多健兒與衣廩而日練之皆精兵
矣彼利得衣廩保室家豈不勝召募督府稱善數月
得兵數千值大水歲祲請徙南兵就食有收處餉遠
米數萬斛貯海上散饑人使者俞允徵是謀則餉米
盡浥爛餒人填溝壑無算也一胥爲妖所憑聞而怒
曰何物妖敢爾檄城隍治之胥夢妖曰梁孝子驅我
我去矣翊日無恙居無何陞陝西按察司副使力疏
投閑居喪絕不茹葷中外歷官十餘年俸外毫無染
指交際應酬一切取足於家自壯至老急於周人父

黨母黨妻黨隣里隆殺有等歲以爲常婚喪不舉莫
不加意衣赭衣呼庚癸昏暮叩門無不應應必滿其
欲而去遠方官學尤所加意送往迎來無虛日人有
片長嘉樂稱羨其拂意者未嘗形色辭孝廉仁厚悉
悉根諸天性非由勉強鄉人慕德孝不能忘饌錢立
孝子祠

陝西按察司副使盧公學禮墓志銘

于慎行

盧氏其先潞城人也徙于東明則自士元始五世而
及遜菴公九錫配恭人蔡氏是生憲副公公諱學禮
字立夫趨庭其別號云盧氏故以服田敦德世爲茂
族贈公乃受尚書隸邑弟子籍因以授其諸子而公
少負異資嶷然魁岸爲博士家言敏捷有法度博聞
強志名稱超然隆慶丁卯舉京兆第再上春官萬曆
甲戌將復詣試而值母恭人病或勸盍且趣裝公愀
然謝曰安有親卧牀簣而千里赴名有如闕于一訣

何以爲子竟止不行頃之遂丁內艱丁丑北上乃
進士筮仕南召令踰年聲績大起天官偉其才望
改臨汾三年報政勅封遯菴公如令秩母贈肅人
幾以外艱去職服除乃補東阿浹歲召爲兵部武選
司主事再遷車駕郎中以望擢兗州府知府三年報
政誥贈遯菴公如守秩母進恭人已復丁繼母憂服
除補守襄陽會播州兵興供億徵輸多所勞瘁又以
權使暴征爭不能下方有歸國旋晉陝西按察司副
使備兵洮岷聞命欲謝不往所知咸敦迫之爲一持
節莅鎮又與勅使爲忤竟拂衣歸歸不數月軍肉腐

不踰歲考終于正寢公爲人誠長者也貌樸而偉性坦夷無城府接人辭色雍雍雅情義藹然而凝重不佻口若鈍于辭然于世故民情談說娓娓曲中肯綮至竟日夜不倦居職廉儉無所紛華取簡靜寬和爲理絜綱疎日恥言細苛而比讞精詳綜理靡密術胥不能欺也事使之際不爲崖異而動有執持亦無能撓其法者蓋純然古循良吏矣南召僻小邑然在山谷隱塞中多礦盜公日夜拊循小民樽節裁省與之休息因以嚴飭烽燧盜不得發境內無虞臨汾平陽所治煩劇爲尤公居是邑獨久外寬內敏不嚴而辦諸

緣飾文具者不及也吾阿號當路邑其繁不及臨汾
其衝倍之公不滿朞月政通人和誦聲交作赫然最
晉中矣充爲東方大府方制二千餘里介在兩都之
中最稱望郡公以三邑之政移之于守風聲所樹二
十七城罔不蒸蒸如在宇下兩臺諸使以疏言治狀
且十餘上天官考其治績表爲某省憲副候命未下
遂以憂歸故再補而後遷位雖尊顯于公資地稱淹
久矣猶以不能爲容拂衣而老仕林惜之而里人當
公之卒識與不識皆爲歎息泣下至空市走弔則中
心誠信所感矣方公守兗予已家居公因請修郡志

三年書成捐秩金梓焉而其中紀公政績及邑不及郡以在事避也今公已告終方議俎豆之典則郡政可績成矣然予稽漢循良傳召父爲上蔡長第言視民如子無所臚列及守南陽述爲民興利事甚備而曰治如上蔡朱仲卿愛利之澤詳于桐鄉及北海太守但言以治行第一徵而不著其實此兩君皆公所嚮慕者固云詳略互見亦所設施久近便否未必兩宜矣今公爲吾邑邑稱良長吏及爲吾郡郡稱良二千石不易地而兩奏成設有傳國史循良者取二志而徵之豈非西京諸賢所不及備者與

陝西按察司副使石公繼芳墓志銘

馮琦

今上十九年寧夏降虜哱氏反觀察副使石公及於
難制府魏公督諸鎮兵討賊賊嬰城守上以制府
稽天誅逮繫之於是巡按御史劉公上疏言先後諸
臣死事任事狀請釋督臣學曾責成功而贈故副使
繼芳官上怒制府未解疏入留不報是年秋賊出
公柩乞緩師踰月賊平長君嶠泣血扶柩以歸明年
四月葬於祖塋之次公字克肖別號倚宇世爲益都
人高祖瑛瑛生銘銘二子曰存仁存禮存仁生琚琚

娶某氏舉二子長曰繼節公其次也自銘而下皆以積學能文章取科第公生九歲而孤與其兄梵梵相倚盡發父書伏而讀之且讀且泣志意如成人甲辰同爲郡諸生乙卯同舉於鄉長公仕至汝寧郡丞公亦屢上春官不第領猗氏學博士部使者檄三晉士皆以石博士爲師居二年擢桐城令會城青浦郡御史御史計大江南北無如石君才請移石君令青浦桐城民走詣闕下上章願留石君朝議竟以石君子青浦桐城民不得請歸而肖其像祀之爲之語曰陳父石母陳父者趙人于階也公爲政先自檢御不失

尺寸操左右凜凜一歲再考覈之有罪立取付法酷
訟平允善鈞距語次驟尋具得其隱伏亡敢詆讎比
邑事多待公而決罪人失出與非罪而離于法公皆
平心案之盡反其獄詞歲數百人初城青浦召父老
與計事人各盡所欲言議既定豪右爭欲就其鄉立
邑要說萬端爲飛語以撼之公終不爲易建城建學
宮公署及市肆衢路皆先爲區畫事已而質之不愆
于素士民始服亡異詞政成召爲司隸叅軍司隸號
爲親軍故事叅軍畫諾而已公視事引當否執持甚
力衛帥某及兩千戶以重賂私授校尉官公上章直

其事請兩千戶皆調外衛諸武人目攝憚之五年遷
度支曹郎監河西鈔關及大通橋京糧廳所居辦治
吏不得爲奸司農宋公亟稱其才乙酉擢延安守公
治延安用嚴爲理而時有所寬貸大略如治桐城青
浦時而獨持大體不問細事與百姓約曰邊地苦寒
非盜賊殺傷人及猾吏爲奸利不受理故郡守視事
日夜不得休號最煩劇公坐堂上延見吏民治簿書
從容退食嘗有餘閒及公入覲佐者代視篆日不暇
給如故乃嘆才不及石公遠矣制府疏請以公爲行
太僕少卿故司農宋公爲太宰矣持其疏不覆曰罔

寺非所以待石君乃擢觀察副使監寧夏兵無何而
難作哮拜者降虜也積功至副總兵招故部落數千
人勢橫甚故中丞及監司折節禮下之不敢問公與
中丞党公計曰是狡胡有輕中國心急亦反緩亦反
反遲禍乃益大乃稍節收其權以法裁之公請增牙
兵備非常事未集而哮氏反公至死無所屈撓聞者
哀而壯之公內行淳備居官廉無餘貲性警敏有心
計善論事事無難易以咨公立決其治主執法然務
合人情所至多釐革然必先有所寄若爲他事發者
後乃及其本謀百姓日由之不知也再治劇邑守邊

聲名絕出一時去而百姓歌思之居軍夏八月而
嬰難嗟乎公豈獨守令智監司愚自古降夷立功名
見邊兵虛實未嘗不爲禍始獨其規摹有小大舉事
或遲或速耳假令如劉石安史有強力邊臣早以計
並剪其萌芽卽不就彼計不俟百全而終中國其亦
早知而殲之一國是卜豈爲一人公卽死賊亦早誅
公死何憾哉公生嘉靖戊子四月二十一日卒於萬
曆壬辰二月二十八日享年六十有五

陝西按察司副使薛公綸墓志銘 王家屏

余爲諸生時則聞天城薛汝爲氏有儒譽心慕之已
赴省試集同郡士識公於稠人中揖而與之言契若
雅素嘉靖甲子公以國子生舉順天鄉試余亦以是
歲充貢籍又同舉戊辰進士交益親因與締婚姻之
好焉公歷仕郡邑踐剔中外所至用治辦顯而余竊
祿二十年尺寸無所自効才能不逮公遠甚乃公竟
先余罷復先余物也傷哉按狀公諱綸字汝爲號幼
泉其先揚之興化人國初諱士秀者以從戎徙河曲
再徙天城衛遂家焉士秀生鎮鎮生玘玘四子春雲

雨雷雨雷無嗣春二子長經次綺雲卽公父以公貴
贈其配柴氏是生公及纓薛氏世力田以農致饒後
稍受買居墮笑維楊而業儒則自公始公生有異質
少與伯兄經同受書塾師所伯兄未及旬公已數行
下比伯兄一再讀則公已成誦掩卷不復省其爲文
亦然縱橫數百言立就文藻爛如也於是伯兄自謂
力學不如仲敏謝去治家人產佐公讀公學益專以
弱冠補衛學生兩試省闈不利會虜大入攻當路塞
贈公夫婦並遇害公泣謂伯兄爲丈夫子不能挺身
入虜磔臊羯奴雪父母之恨地下寧能處危巢坐待

覆卵之禍以殄吾宗耶乃盡以家乘屬伯兄而輕身
東游游太學從日門胡先生講業刻厲苦攻更三年
不返卒成進士筮仕長安縣縣麗會省寇蓋雲集簿
牒叢委公至檢宿案次第籍之晨坐堂皇呼吏抱牘
上須臾論報輒盡徐起升輿走謁官長嘗日中及始
還賦訟待理者纍纍擁縣治召入鞠之須臾決遣又
輒盡於是豪猾吏咸吐舌噤不敢置一詞旁近縣訟
多願就公質成者治行稱三輔第一焉歲辛未奏最
當徵大司馬以公邊人特言於銓省擢兵部武選主
事武選吏視武人子若居重貨非厚賂輒引他例備

其級或遂除籍不敘公躬嚴選簿鈎校功次有朝投
牒夕受官去者所全甚衆又條上制虜安邊十數事
其大者優畱并以儲將材而罷入貲之例練土著以
實行伍而息勾軍之擾復屯鹽以充餉而紓召買之
累繕城堡以固守而停不急之工言鑿鑿中窾大司
馬譚二華公奇其畫擬調公職方會開封守缺藉才
者願得公遂領郡符以出至郡剴剖繁劇斧解刃理
恢恢有餘一如長安時而彈壓疆藩推抑豪右嚴重
有加焉於是治行復稱河南第一歲己卯秋試諸生
阿直指意攻冒竊詞連督學公不直諸生會督學窮

治諸生急其父兄貴有勢者遂以此遷怨公謀擠之
望而甘心矣壬午擢陝西憲副治兵定邊當市羣虜
索賞而課莫能止公前叱言撫賞歲有定額若等背
約而索豈以來歲當不復貢市耶虜衆望見公儀貌
魁岸驚若神人咸應聲懾服終市事無敢譁者督府
郃文川公甚倚重之將遂薦公開府而向遷怨者業
撫開封事噉給諫某論公解任待勘勘無驗部覆調
用未幾值政府鼎革之際楚人噓江陵餘燼以攻晉
人首大用冢宰遂波及公若以鄉曲故見庇者不勝
則復噉楚人按關中者論公定邊事乃公任定邊繼

兩月耳尋端不能得竟乘大計蜚謫罷其官既罷士大夫交書唁公公怡然自得也曰某幸席先世之產兄弟買資其於學以有今日於某足矣敢薄山林時薛氏不析產已五世鹽筴在維揚者季纓是理之以是公子姓婚姻田宅奴婢南北居半數往來省視以爲常余每規公人豈鴻雁也而翔鷺南北僕僕不憚煩耶公復好客喜酒池館之則房闔之間所至觴具設焉間用聲伎余皆不謂善公顧樂之要以公長才大略鬱勃而不得宜非託於奔走經營飲食燕笑則無以澆胸中硯礪發舒豪宕之氣余所謂煩乃公

所謂快耳余甚愧余陋而慕公之達宜有得於養生
之指乃一旦疽發於股竟以不治此余所爲痛恨於
公之罷且切也公內行甚備而昆季敦睦克紹五世
之美旣貴不渝尤人所難爲昆季入貲而拜爵經鴻
臚寺序班纓太醫院吏目則昆季皆衣冠矣昆獨子
爲置側室廣之季有子爲延外傳訓之則昆季之則
皆詩書也歲大侵道殣相望約昆季發家廩以振餓
者計捐三百金以上號於衆曰此吾昆季農且賈之
積也於是季昆又皆以仁義聞鄉閭矣爵不獨私其
身祿不獨私其子富不獨行其德其篤於倫誼如此

六論吏事哉

陝西按察僉事林嘉猷傳

忠節錄

林嘉猷名昇以字行浙江臨海人師同邑王琦琦坐累徙雲南族姻無敢顧者嘉猷徒步千里追送泣別人高其誼後與鄭叔貞負笈六千里至漢中師方孝孺時學於方氏之門者踵接而孝孺獨以得二人爲喜曰匡我者二子也洪武末以儒士校文四川建文初薦修高廟實錄入史館爲編修遷陝西按察僉事嘗被召入燕邸得其隱知二郡王素傾世子以告孝孺孝孺言之建文君遣錦衣千戶張安持書請燕許世子王燕燕內使黃儼因問世子計且得行世子

竟先發事遂渡靖難後坐方黨逮至京死之

陝西按察司僉事呂公益傳

李

濂

呂公益字伯謙別號梅菴世爲祥符人祖仲賢父傑並以長厚稱公性資闊達正統元年丙辰入邑學摘藻綴文冠羣士十二年丁卯以書經領河南鄉試景泰五年甲戌登進士明年乙亥授陝西道試監察御史是歲九月昌平侯楊俊爲家人楊榮所奏戕亦旣著於是刑科都給事中王鎮等浙江道監察御史費廣等會劾之詔下都察院鞫問諸御史皆難之時左都御史蕭公維貞乃以其事屬公竟抵俊于法十月奉勅印烙直隸鳳陽等府馬匹時廬州府無爲州等

處連歲旱蝗虧損馬三千九百餘匹小民窮困弗能
償公爲上疏于朝得蠲免丙子八月實授本道監察
御史天順元年丁丑五月巡按廣東時都察院右都
御史耿公九疇欽天監掌監事禮部右侍郎湯序各
奏稱在外大小問刑衙門見監輕重罪囚或有冤滯
上千天和行移巡按御史會同三司官逐一審錄有
可矜疑者具奏末減公星輅過歷郡邑夙夜清審多
所平反而廉欽化州等處蠻寇猖獗攻劫城邑荼毒
生民公會同鎮守左少監阮能副總兵都督同知翁
信按察使方員左叅議熊鍊都指揮俞事孫旺等督

兵進勦身親矢石掃平巢穴已卯三月得代回京十月勅往直隸通州直抵山東東昌府緝捕寇盜明年庚辰二月地方寧謐還朝三月石亨姪壻大同都指揮使廖傑不法事聞朝議行巡撫都御史王公宇勸問適宇議事回京患背疽未愈公被薦代宇往問傑伏辜六月勅在京巡視九門并提督北城八月德勝門奏各山軍民不知何故驚疑移居入城公奉旨詣西山一帶撫安人民九月終事定還朝仍巡九門辛巳十一月提督通州糧儲并巡視李家庄等處草場壬午六月六年考績十月督捕真保定大名等府寇

盜癸未三月巡按隆慶州并大同宣府二鎮甲申擢
陝西按察司僉事成化丙戌春考察被廢公解官歸
居鄉三十餘年謝絕人事不輕至公門惟慶賀聖節
長至元旦暨郡大夫敦請鄉飲則一出杜門省愆安
貧俟命壽八十卒公蒞官十二年任事敢爲不避險
難人多以慙目之竟以覲獲咎免官論曰余少游開
封郡學充弟子員每春秋丁祀有事于文廟周覽廟
制規撫闕敝心竊仰嘆老生謂余曰汝知廟式之所
自乎此吾邑前輩呂先生之所經畫也曰何以知之
曰天順丁丑呂先生巡按廣東而會城學宮久敝弗

稱祀事先生甫下車首謁文廟目擊廢墜乃下令修
建斟酌損益曲盡其制有圖藏于厥家成化間吾郡
守河東張公岫奉檄修學咨訪格式適先生致政里
居出圖以示守持闕白于臺省咸稱善因如式更新
云又曰泮城倉西街先生之舊廬在焉泮人呼倉西
街爲呂御史街云

陝西按察司僉事劉道立傳

杞志

劉道立字成已成化庚子舉于鄉明年成進士授朝
邑令值歲侵多方賑濟全活甚衆有刺客殺人而逃
誣及無辜已成獄數年公至獨疑之忽白晝若有神
明附耳曰景陽殺人柰何誣無辜公怪之陰遣人密
偵果得所謂景陽者一訊而伏由是邑中號爲神明
尋擢監察御史立朝剛正不阿時劉瑾用事勢傾中
外公獨毅然不屈面折廷諍爲時所重出按真定幸
采栗栗墨吏望風解印綬去後陞陝西僉事丁外艱
復除陝西尋丁內艱復除廣西致仕起山西尋調陝

西泚會事未幾致仕前後二十餘年未嘗攜妻子之
任公性剛毅鎮靜易事難說有古君子之風焉

陝西按察司僉事張先生璉墓志銘

崔 銑

明興造士用經純哉懿矣士鮮服行惟用致宦高才
逸志斯修詞業乃至矩唐汚人之詩先生幼有遠志
自經而下程氏朱氏是宗俸餘皆置圖書累數千卷
嘗曰稱理制事各適當然是謂明經理云理云空滯
云乎哉經云經云口耳云乎哉先生行方貌莊言論
侃侃必信已直一介弗撓登弘治丙戌進士出知尉
氏改宜揚課農興學旌良恥否流亡者還健訟者息
入內臺爲御史逆瑾銜其直罔以罪卒無驗止晉河

南僉事提學閩奴廖鵬陷之改陝西河外收糧都御史張甚貧而愼先生及御史成文裁以法制某不堪誣嚴先生於總制總制聞于朝有旨覈驗某卽實以上再命官鞫之某大用賄下先生于詔獄凡三年臺臣數論列誣乃明是時內閣公素嫉天下名士輕已翻右某坐先生不遜除名嘉靖初豈用屈滯併有讐先生者在當路沮之成公再起爲閩都御史矣先生屏居山中讀書談道考訂古義得失正德間士厭明文沿宋靡泛之習欲振起之乃宗秦漢之作式氏大異先生弗是也曰是書真妄錯互而妄者倍焉苟說

詞迷趣經學將晦自六經四書程氏朱氏外無用師
焉已耳先生諱璉字伯純山西澤州人曾祖斌斌生
瑜瑜先生考君廣川先生貴封知縣先生著書曰
遠言曰舜澤記曰文集總若干卷

陝西鞏昌府知府戴公浩墓志銘 豐熙

鞏昌知府戴公諱浩字彥廣然菴其號致仕家居二十有七年進階亞中大夫十有九年郡大夫飲射讀法在賓位者二十有四年熙兒間觀禮明倫堂見公歸然如靈光修眉皓首進退甚詳又聞公長羣宗時論以尊祖睦族正倫務學之道一無抗越置義塚義塾生教死瘞暇日登樓嘯咏有然菴集和鯉庭吟彙成書或游戲繪事以自適子益陽丞樸連城教諭縉綽有父風皆吾父執友熙以故稔聞于公之沒痛切梁壞已而其孫鯨同舉于鄉又同舉進士號最密今

鰲爲南京刑部郎中權尋甸知府則公沒三十年久
矣鰲父則擢也自郡庠貢成教興化進主連城封奉
直大夫南京刑部員外郎初公以永樂庚子領鄉薦
試春官不第宣德間拜山東東昌府通判九載用薦
擢知廣東雷州外艱去服闋改永州恭年丁內艱再
改華昌年幾七十上疏得請老旣發在道民詣關借
留復之還至潼關會天順紀元循例致仕可謂終始
完潔者在東昌職兼徵租淘河之役風夜勛公有巨
商卅覆曲爲拯殮移文召商屬完其貲浚臨清輝獲
寶器綴付邑藏久之一中貴過云故所喪物言驗給

之人服其廉居雷鋤役翼良繕築海堤漚不病稼登
昌者邊塞也故剗敝甚公至和民飭武虜無一迹值
歲大侵矯發邊儲三萬餘賑饑奏曰請以臣一人之
命而活千萬人之命優詔原之天亦降霖歲用大熟
關山孔道寇劫商賄爲恒公設機殲之泉布以流所
至以愷悌道民東昌秩滿民歌曰于別駕公實惠吾
儂廉慎忘躬能使年豐及華昌殲寇餘羣商集庭呼
曰君侯守邊惠敢無前我道我行蕩蕩平平公笑遣
之其去雷去永民率攀畱有擁輿揮淚者性誠孝始
生七日父以稅長坐成營州獨母鞠之每與念二親

兩朕輒泣下官東昌時遣人代戍北迎父南迎母會
養課最獲贈父如已官階承德郎母安人有喪斥浮
屠禮純用朱氏居常謹飭雅重子姓侍側申申如也
與契分者談至或忘寢旣老不杖燭下可細書望者
目爲地行僊云生以洪武二十四年沒以成化十九
年享年九十有三

臨洮知府劉公昭墓表

廖 莊

公劉氏諱昭字克明約禮居士其別號也其先居潞城至曾祖伯元徙今上黨大父文益父彥威隱德弗耀母李氏繼牛氏咸有令德公李出也穎敏秀拔七歲從大父鄉飲郡庠六守荆山黃公目其資稟不凡曰此兒後必爲公輔器盍令讀書年十五補郡庠生受業於郡博士三湘易先生之門稍長益勤不懈遂淹貫經籍爲文章沛然溢出蓋是時已嶄然見頭角矣宣德改元以禮經中山西經魁明年會試京師登進士第觀政刑部練達治體爲大司寇所器重正統

辛酉擢給事中於南京封駁章疏一乘至公糾舉六卿不避權要侍宦官監收倉糧民被其害公卽陳言獎用以革皇戚門禁頗無畏憚公劾奏嚴出入自是使人有過位色勃之謹而公之名重兩京實自茲始正統戊辰用大臣薦陞知臨洮曰爲政臨民不急先得則失本末輕重矣故下車之初學宮之頽敝者董工修葺以勵人才田野之未闢者令民開墾以重農事郡治舊缺鐘鼓二樓公捐俸市材增創之不越月而成民不告勞益其興廢補遺靡不類此初郡科目累累乏人公蒞事以來恒加獎勸故自庚午至丙子

士領鄉薦升者彬彬輩出矣景泰壬申歲大旱郡缺
食流亡者衆公百方撫綏旣設法勸借以賑之復割
俸煮粥以濟之時濱死而賴以復蘇者不可數計屬
邑民訟不能決者請公一言折之而不情者往往羞
輟自服故刑獄多所平反民以不冤郡有歌之者曰
野有饑民惟侯活之我有田疇惟侯闢之古人謹獄
惟侯平之有此三惠孰不懷之聞者以爲實錄云公
在官七年不赫赫以立威不皎皎以沽名惟砥礪名
節勤恤民隱曰吾惟求盡其在我者而已故其沒也
環十里之內無間軍民皆悼惜之曰安得撫我復有

如吾劉公者耶公生洪武丁丑春秋六十

慶陽府知府郝公鑑墓碑

王雲鳳

君諱鑑字廷直先世長安人金有諱濟賢者爲河間路總管子孫遂居河間曾祖諱志剛祖諱祥思南府知府有善政考諱璿渭南縣丞以君貴贈御史母宋氏贈孺人繼母于氏封孺人君幼好學誦習舉子業雖貧益勵鄉人徐佑得舉回同學者皆避去君獨具幣跨驢迎之成化癸卯領順天府鄉薦甲辰登進士第授天長知縣民有貸而不償者誣券爲偽爭于庭君曰吾倦且休矣取其券令畫字封而去君問券字無異詰之曰券字非爾手筆耶誣者愧服民不知種

麥公給種教之麥乃大獲至今天長有麥以概理雖
政于儀真平心處之無不稱便弘治辛亥遷南京雲
南道監察御史丁未蠲人憂服闋改南京廣東道憲
視南京諸衙倉場搜姦剔姦人皆憚之奉勅清戎躬
閱故牘積歲隱沒之弊多所釐正大司馬馬公嘗謂
尹曰聞君清戎數增于舊而人不寃行將上君積于
朝以勸天下之理戎政者矣又命巡視鳳陽等郡貪
吏有望風解印去者上疏欲起用致仕尙書秦公絃
爲朝論所稱壬戌遷慶陽知府慶陽邊郡久不治民
多穴處不知桑麻君至則革吏胥之姦究徵輸之弊

百事一新且召工陶瓦甃治屋廬教樹藝暇則飾公
署學校民有殺人報父仇者君據法當赦憲司不從
後臺議卒是君治爲諸郡第一正德丙寅年四十有
九卒君孝友剛直尚節槩恤故舊渭南公卒於官君
歸葬一切如禮時思南公二母氏皆在堂曲盡奉養
之道事兄撫弟友愛獨至登第後盡以祖遺田宅與
之同年主事蜀人盧錦與中貴人構隙坐廢道遠不
能歸君時尹天長適至南都見之遂與同舟至縣僦
屋居之遣邑子弟穎秀者從之游擇士人女爲之伉
儷在慶陽宗藩若邊將以綺帛餽者一無所受君居

卷之九
官二十餘年仕至郡守俸祿之外一無所增教子以
讀書爲事卒之日貧無以爲葬時維總制楊公知公
爲深令有司厚賻其喪而歸之

鞏昌府知府贈光祿寺卿曹公琥墓表

費宏

嗚呼是爲贈光祿寺卿秀山曹公之墓公資稟剛毅志行高潔所謂能自樹立不與世浮沉者也當武宗之世錢寧以嬖孽上冒國姓權傾一時士大夫畏之如虎無敢正言不諱以發其奸者正德壬申今中丞王巖周公克之爲御史心嫉寧上疏歷數寧罪遂謫爲嶺外驛官無恥者猶以好名詆之雖得罪公議不顧也而公獨直前論救謂嬖倖當遠忠直當容竟以明比爲罪由主事左遷河南府通判寧以爲謫近

命下未一日又改調雲南尋甸公怡然就道未嘗沮
喪尋量移黃州未幾陞廣信府同知歲丁丑乃擢肇
昌府知府將之任道病還卒于家及寧敗今上紹
統前此守正懼害之當褒卹者所司具以名聞於是
巡按御史王君仲修列公見斥之故上憫之加贈
公官遣廬州府長史諭祭其墓公之所負雖不獲大
用於時然直節正氣不物以腐者固可垂之百世而
無已也公諱琥字瑞卿別號秀山姓曹氏爲樂人其
先祖諱貴從高皇帝起兵以功累官至指揮僉事
曾祖諱儀祖諱亭知安邑有惠政考諱廣爲虞城學

諭以善教稱妣高氏生子二人其長爲南安教諭環
次琥卽公也公與南安兒時皆穎敏異常少長通經
學古文譽日起弘治辛酉與南安同舉于鄉乙丑登
進士第觀政戶部奉命至遼左犒軍歸授南京刑部
主事丁虞城及繼母汪氏之憂終喪改戶部主事旣
外調所在皆以廉勤著聞其在吾信尤拳拳民務是
恤便不便當行罷者可專專之不可則懇于當路期
必有濟時逆濠及鎮守中官假進獻郡中茶葛諸物
符檄旁午濠倚寧虐餓動天人尤莫敢輕忤也公言
此非額課抗不與以狀申臺使且將疏請朝期必寢

乃已豪及中官聞之皆自沮是歲郡乃晏然天旱又
率吏民竭誠祈晴大雨如注郡人歌之署事未及
年惠之及民者無算守缺民幸公補之會公入覲有
筆昌之命民間之莫不愜然曰何爲奪我公而飽
邪使天假公年才得盡用則其澤且咸于天下矣
爲奪之之速邪公生於成化戊戌年僅四十公性
友養繼母如其所生善事南安南安李模自闢遠公
叩關迎候緣道號哭聞者莫不酸楚其學以砥礪名
節崇尚忠義爲本平生甘淡薄勤苦終第時有司
例外饋賄一無所受歷官中外逾十載一龍之植

一瓦之覆以遺諸孤其卒也賴郡守向公文璽高公之節爲之經紀喪事乃克葬云嗚呼俗之偷也久矣士大夫貪慕榮利以失得爲患惟勢所在爭趨之蓋龜媚穴窺曾是不恥而反以爲工巧焉公於波流風靡之中乃能黨正擊邪甘蹈禍罪豈不誠難哉况挫之而愈勵真心雅操一初終而征變邪夫一世甚短萬世甚長彼偷合苟容者高都濃饗非不足以取快目前然自公視之不啻如穢蟻類蟻何足爲重況蓋棺論定公議終不可掩焉得如公之死而不朽乎

西安府同知朱公光霽墓志銘 李元陽

公諱光霽字克明號方茅先世灤人國初戍籍應天
既而移戍蒙化遂家焉父恒齋諱某中成化丁未榜
進士筮仕畱都廷評娶晏氏生公公幼穎敏不與羣
兒戲父母異之及恒齋歷官爲貴州憲長適陽明王
先生謫居龍場命公與二兄投學得聞良知之說自
是知俗學可厭冷然有薄富貴輕勢利之想父命母
廢舉子業癸酉領雲貴鄉薦上南宮弗利嘉靖壬辰
授重慶府通判自奉清約催科撫字犁然當于人心
謠頌滿道聲望大起有僉事發銀買簪時公視府篆

遂持銀入白曰通判自幼但知讀書未學造轡也倉
事且怒且慚而寢撫臺善謔人府任以下皆屬鞭笞
獨遇公以禮退謂人曰朱通判非常吏也會有獄變
人危之公捕獲無遺上官相顧稱其能凡蜀事有齟
齬積歲莫決者皆檄公使治公片言而決以是難獄
系訟皆之重慶矣丙申遷知綿州州多勢家私役州
人乃其常俗公至悉除之一日有稱尚書府家人徵
州夫栽田者公曰公田乎私田乎其人曰雖私田舊
規也公揭律令示之其人不悟而索愈固公呼吏問
獄出罪囚使領曰此數百指可爲栽田用矣其人曰

恐不可公曰吾亦以爲不可者哄然其玩世往往如此故其爲政直遂不阿累爲臺臣所嘉三年遷西安府同知時有修復河套之役百務填委公酬應各有攸當益爲監司所喜因使公在邊七年之內七度防秋曾無失事織造貂璫擅作威福吏大小望風跪拜公獨不爲屈膝貂璫銜之偵伺其所爲無隙可中乃已其治獄明允多所平反長安人擬之爲包孝肅委署華州朝邑蒲城諸邑所至有惠政關中御史楊公得不可輕許可獨致書謝公謂公有益生民公勤勞旣倦累乞致仕撫按諸司惜其年勞再三勉留公不

告而去飄然長往竟歸白下尋復還蒙化西安太守
欲全其官遣吏遙送給由文憲公曰豈有旣吐而復
噉之理時邸報以陪點會憲公曰卽爲會憲宦味只
如此耳堅不赴時論高之公爲人慷慨有大節寡交
游惟同郡雷御史覺軒永昌張昂同成都楊修撰升
菴大理趙中丞雪屏及子數人乃其所厚善也里居
歲久滄緇人如任冶山少叅孫豐泉太守皆致禮造
廬慕其舊德遇接到公扁其門曰耆英歷官十餘年
歸橐蕭然家徒壁立予分田數十畝始能卒歲然日
誦陶詩以自娛樂不知貧之切骨老之將至也庚午

十月朔旦謂諸子曰予了上天玄機回造化真意汝輩際此文明盛世勉修忠孝大業吾無恨矣語訖而逝公生以弘治壬子卒以隆慶庚午

乾州知州李英傳

祥符文獻志

公諱英字士奇其先北平大興人洪武初曾大父貴避亂南徙始占籍祥符大父義號玄真父跂號足菴咸以敦厚稱公自幼聰敏力學遊開封庠以易中景泰丙子鄉試丁丑會試乙榜弗就庚辰奉足菴翁命授陝西鳳翔府學訓導立教嚴勤士類有造而寶雞亦以攝教爲得師間委攝別邑輒以政聞郡守古雄侯公雅重公優禮之時通許故都御史婁公與同鄉張楊二公同叅陝政二公乃以婁女議公婚遂歸焉成化庚寅九載秩滿擢尹山東之昌邑壬辰丁內艱

甲午服闋時都御史鈞陽馬公文升撫治陝西薦公
才可治朝邑允之至則樹良法剷夙弊鑄鐵人嚴門
禁庶政修舉無私謁者丙申例考三載滿適巡撫都
御史青神余公子俊旌薦公已亥擢知涇州朝邑之
人立去思碑會巡撫榆林都御史楊公浩薦公爲管
理邊糧通判而先已授涇守矣涇俗鮮戴網中公諭
之諷民果翁從亡何足菴翁歿於宦邸公扶柩歸汴
服闋改知徽州巡撫陝西都御史鄭公時以更賢育
民上言乃調公乾州路當衝要迎送無虛日公竟以
勞瘁成疾卒於官時年五十四先是朝邑溥濟里民

薛旺殺死薛美逮及呂興同罪公曰因姦殺人惟恐人知呂興何預細審之果然由是呂興得釋遂圖公像舉族奉祀焉成化丁酉歲旱春夏不雨公齋戒禱於城隍不三日而甘雨降禾乃熟丙申黃河泛漲淹沒東鄉水至城濠城幾陷沒公設法賑濟築堤捍水鹹地淤爲沃壤米退民爭之紛紛莫定公親詣畝畝驗冊分撥強不得以凌弱也公修建朝邑城池學校壇壝官署倉庾五六百間以漸而成民不知勞其政略見於去思碑者如此

信陽州知州施君文顯墓表

邵寶

信陽知州施君旣卒且葬其子庠生逢原請予表其墓上之石子時在浙藩受其狀而諾之越十有二年予以侍養歸自戶部始克最公事行之著者載之篇俾歸刻焉君壯時與匏菴吳公同里閤且同游庠序日相講習自經學外博極羣書文名竝稱於人公亦雅重君後屢屈禮部惜君者往往援公爲言旣而就選得同知許州人重惜之君在許實與予同官予政暇輒與辨質所疑君曰此在禮法云何前輩某某嘗有論云何或所行同異予酌而從事故雖一州之小

有大議出焉於是南京工部侍郎海虞徐公方爲藩
及巡撫嘗致君而客禮之相辨質如予蓋君爲貢士
家食且久獲遊先達諸公間故多聞如此弘治初修
憲廟實錄河南省臣徵編纂官於屬獨以歸君君寓
相國寺合諸郡所上督諸生數十人校錄而筆削之
編成論者謂有史體許屬邑臨穎稱校郎城稱野君
以武御史檄先後掌其事各以俗爲規民漸底訓監
司才之已酉歲京運祿米先定價不足於納郡縣避
嫌莫敢言者君言於巡撫徐公俾給時直民免重費
太康縣民地百餘頃與藩府莊比藩卒據爲莊地奏

下撫按屬守巡官臨視民負冤至輒集衆以抗累歲
未決君最後承檄往民抗如初君徐諭利害且示無
偏意民喜躍出舊籍民抵其境度而疆之民不失地
藩卒無辭徐公忠纖造絲直爲奸人所漁特檄君往
市于湖州物美而直省其羨歸于公於是清譽曰著
徐公會巡按御史上公狀會信陽缺知州遂自許州
擢信陽壤接湖湘軍民雜居故稱難治先是非進士
若故京朝官不與而君以州貳擢初頗訝之君至召
舞法吏先諭後治令出肅然衛職肆橫成習君處以
禮法不少假借若其同官有隙君復爲分解卒致感

服屯卒占民腴田聞君風悉還之有選人寓平常逆
旅民姚琪者豔其妻謀死而奪之鄰人訟焉君得情
於其幼孤竟抵姚罪君兼通醫學在許嘗蓄藥施民
民病貼危而起者有之在信陽亦然凡此皆吾所謂
事行之著者烏乎君子之於學患無其實苟實有之
則前雖或屈而後不能不伸要之知己有無是繫抑
亦有天道焉如施君者所負不止此而卒此焉止非
天其孰爲之雖然君之名在在浮于爵位人亦不能
抑也固亦天哉君諱文顯字煥伯別號虛菴其先毫
州人南宋時始居蘇之長洲縣國初有教授某者三

傳至君父忠娶夏氏生君三歲而夏沒君鞠於祖母
潘氏年若干以府學生舉成化乙酉鄉試自丙戌至
甲辰會試連不利以經學校徒凡若干年年五十二
始官許州八年之信陽又二年乃老年六十二後年
七十四以疾卒

漢州知州柴公廣傳

祥符文獻志

公諱廣字文博祥符人也少游開封郡學誠實不苟與朋友約風雨必踐每遇文廟春秋丁祀必易服齋戒以往年四十四妻溫氏病卒公曰吾已有子矣誓不再娶景泰間應四十以上例貢入太學始仕四川鄆都縣知縣廉介有守遇歲大旱公禱於神曰此令之不德所致乃省已過理冤獄不三日甘澍霑足先是邑無城池公嘆曰城池所以衛民也茲役非令得已於是申請上司役民興工平地則築牆山岡則栽樹城郭完整是時土民趙鐸嘯聚倡亂勢甚猖獗公

事邑中壯勇之士以身先之遂擒首惡地方底寧於
是巡撫都御史汪公巡按御史江公會薦擢漢州知
州公之至漢州也修學校建典梁均賦役政績著聞
亡何乃引年乞致仕而鄆都漢州俱立去思碑公既
歸築室陳橋集北口誦內典施藥濟人埋枯骨飼幽
鳥凡鄉人婚喪不能舉者倡率鄉之仗義者共爲津
助公歸居五十餘年室無如妾弘治初鄉士夫高公
之行乃連名具呈於巡撫都御史海虞徐公恪行縣
查勘得實奏請旌表以勵薄俗壽九十七歲卒於家

知州吳君懋墓志銘

李元陽

嘉靖甲子十二月四日順慶府通判陞階州知州高
河吳君卒於順慶官舍貧不能歸自撫按藩臬而下
皆悼惜之賻之又遣官護之郡士民執紼十餘里民
有願畀輿長送至家者君姓吳氏名懋字德懋高河
其別號也其先山東寧陽縣人有諱驥者國初戍大
理遂爲大理人高大父諱信曾大父諱瑀大父諱大
經封文林郎父諱堯獻以正德丙子舉人歷墊江通
山知縣有詩名母熊安人丁丑年八月二十八日生
吳氏自封君而上世以忠厚孚於鄉及君考中式人

以爲忠厚之報嘉靖庚子君亦中式閭里相勸曰盍
效吳家君弱冠能爲古文辭藻思逸發前輩以陸機
日之兼工篆籀行草成都楊升菴脩撰謫居與君甚
善徵君作寫韻樓等賦自以爲不及君既三試禮部
不偶迺就銓除得今官到任甫一月會蜀中采木至
是檄君董解人謂君初任不省茲役有重大干係皆
私爲君危之君曰行止非人所能也命也遂受檄而
行他郡同事之官機械百出巧於取利或以勸君君
曰貧富非人所能也命也遂不顧而去旣而如京師
諸同事者多失事繫獄君獨無失得竣事而還以所

存銀數百金還官帑上官異之屬郡缺守君攝守事
凡一切利害應罷行者無不悉心力而爲之未嘗以
攝署自苟而郡中望君亦如真守然是以君雖佐郡
而專理退日爲多惠澤及民亦與日積聲聞加于上
下他州咸有借寇之願于是委署雅州又署廣安州
所至以廉惠稱撫按交薦于朝甲子陞階州知州君
曰體力漸衰宜久役乃疏謁上官求致其事弗許
益埤以政書則獻合省之獄夜則校合試之文而諸
司乞詩乞文以卷冊交投者盈案敝床時方七月揮
汗應酬裹以章服客退輒拈筆作字卷冊旣稀君之

鬚髮盡白皓然非復舊人與疾回郡已伏枕不支矣
病且革家人亟召寫真君取筆自題其像曰爾貌蒼
然爾口訥然履仁義如坦途付死生于適然噴渾之
水湛然月之光皎然非無非有非無有打破鴻濛混
沌天置筆而瞑時年五十初君中歲學仙知其難成
乃閉却書從余游於禪衲之間一日告余曰禪卽喜
怒哀樂未發之中將非孔顏樂處耶心齋坐忘墮體
黜聰乃其法也自是常默坐終日時有洒然自得之
趣時已絕意仕進後爲友人所強踟躕久之乃去嗚
呼孰謂君去我而竟不歸也郭南執手之別乃爲永

訣期耶嗚呼痛哉君平生以不欺自命交游間咸謂
君無一妄語蓋天質之美其生而成者乎至其爲詩
辭當在國初高楊張徐之間所著有南霞集行劔子
乘槎稿葉榆檀林志行于世屬續之際有文章如牛
股女子不知收藏以袞裝載漫漶不可復尋矣君嘗
曰世人托文字以不朽愚意不然當別有不朽者在
由此觀之君固不賴此而存矣

知縣贈少卿孫公璽墓表

崔 銑

正德六年蜀盜寇漢中略陽漢中間道也都御史藍
公章集省臺議略陽知縣嚴順懦扶風知縣孫璽毅
而多知可使遂檄璽往城略陽扶風君旣至略陽將
下令順恥之教邑人賂扶風君金求勿城扶風君不
聽日周行相地勢布民築之期一月成城未屆期蜀
盜卒至城三面成東門觀堵始立城中兵適調他所
嚴順曰城必不可守曷亡扶風君又不聽順故令也
城中人聞之譁欲亡扶風君抽佩刀所坐几曰敢言
亡者如几乃盡出城中弓矢力令士賈輿隸人持之

登城礮石積城上如阜水沃飽披之障矢小甲統十
人統甲五十人官與士統之曰令爾守南城曰簿爾
守北城曰典史爾守西城曰東城木堅惟予守曰爾
士爾甲賊如陷城戮爾父子妻爾女火爾室傷爾蓄
爾寧勿傷心義生勇勇則無敵曰凡我官存亡視城
民胡可棄天子命吏勿奔曰爾士爾甲晝傳食夜張
火鳴柝爾甲執子扇傳命斷者刑舟人違令發篋上
舟獲之剖舟人耳鼻以徇閱三日賊弗克攻欲去會
賊執告急人殺之發公移知城中窮賊悉衆環攻之
攻東城自晨至脯不下有健賊戴木案趨城下礮石

下破腦而死已而順奔城陷南城入執扶風君扶風
君罵賊賊齎殺之七月十四日也賊大掠三日去順
渡江還牘報曰與扶風知縣同奔而溺水蕩扶風知
縣尸都御史怒責求尸棘順大窘與簿謀取江濱一
尸棺之還其鄉其兄弟暨子暨族人啓視之多髯而
碩體非扶風君也乃走京師投匭辯事下御史王延
相治乃得實奏上制贈光祿寺少卿賜祭蔭子紹卿
爲國子生嗚呼順非宿憾君惟恥其無能語曰忤心
慄干戈小忿必敗大謀扶風君死信烈矣漢中非荒
裔也猶待辯而核否則上下罔於順而不知自蜀蓋

起至扶風君死時已數年是時藺盜寇中域桃源盜
寇江西虜數入邊值世久平文臣短於謀武臣短於
勇長吏習於奔初秦強陷民於城下得尸肘紫縣印
知爲令段牙也朝廷創聞死事者嘉之贈太僕少卿
蔭子爲錦衣百戶世襲已而子所聞上蔡令霍恩西
平令王佐裕倖郁采與扶風君事甚偉夫迫而死偶
而死畏而死激亢而死彼猶有驅之也志定矣功修
於素節墜於危而安與丈夫哉扶風君字廷信山西
代州人明春秋深慕荀息之爲人少舉於鄉初令諸
令諸風有治績死時年四十七其兄現弟河從子太
史紹先紹祖子紹卿具衣冠招魂葬于代州東門外

鳳翔令王君命墓志銘

余繼登

王君諱命字欽甫別號鶴程真定饒陽人嘉靖甲子與予同舉于鄉然而未識也萬曆丁丑予讀中秘書始識君于長安見君壯懷慷慨有烈丈夫之風焉明年君求予次女爲子婦予以地里遼遠未應而同年劉君雨峯諱閑說百端至卧予寓所要之不得已許其許自是會君愈數愈悉其爲人君負氣自豪意不可一世予謂君君子知天下之不可上也而下之時舉禮自卑尊人之道砥君君始不謂然而後乃折服也君善飲飲如長鯨之吸川大白數十可立盡予謂

君爛腸之藥胡可常也久之而君亦不復雄飲矣君
家裕而自奉簡亦慙不以施人予謂君稍有餘補不
足天之道也行道有福君深有味于予言漸損貲以
周其鄉人若君者可與並爲仁者也丙戌春子女歸
君之子王生亮方未幾君遣生來予宦舍從學于貞
復楊先生生聰明沉靜日兀坐一室讀書之外無所
嗜好于笑謂君此千里駒也當不至如君久淹公車
矣戊子生入爲博士弟子踰年君繼配李孀人卒娶
趙氏女爲妾趙慧而善媚旣盡君遂恃寵無忌間竊
君所藏金賂諸賊獲旣久而中外咸獲無非爲趙者

生懼傷君意不敢以告但乘間言古云朽木不可爲柱卑人不可爲主父何不立繼也君頷之旋以語趙趙大恚恨始厚賂諸臧獲爲魔鎮符不效則市毒置食中以毒生與予子女食少但病卧得不死生食多病遂甚不能言然猶能于牀褥間頓首指口求飲趙禁不與遂死趙喜得計益以厚賂潛納他人彌月子爲子君弟順菴君爲君備道其事而君不悟也比趙死前事悉露檢視藏金悉歸烏有蓋君始悟而悔恨無及矣先是君舉三孫皆相繼夭至是遂無嗣君才高旣不售亦無意仕進會有言惟積德可以育子

惟仕宦可以積德者君欣然校牒銓曹除鳳翔令因
搜其家餘金索而之官比履任一主于飾愛盡減請
供應不以煩民直指行部至僅具廩餼且自言邑居
貧甚令不能加賦以飾廚傳令當罷去直指大駭既
而廉君治狀語諸守巡曰今古人吾儕當共調護之
俾行其志君以此益展意自信邑之驛騎每爲往來
者所倍取或倍索其直折辱之君乃置籍于座右按
牒而給竟無敢多索一馬者歲所省凡若干金郡邑
歲時公宴舊皆倚辦里甲胥胥因而乾沒其中君省
見年諸役悉令歸農而計費授直平市之民所省復

若干金公用器具一切出入司之者不敢問時苦賠累君白于守自掌其籍計籍以出計籍以入終歲不損一物所省復若干金而站糧之新派丁力之加派者悉從豁除矣兩造具君但判其曲直不科贖緩薪俸所入別貯之日詢民之耕不能具牛種織不能具機杵者貧不能婚嫁者逋官租久繫不能償者咸以多寡周給之俾各安其生業邑有尼以妖淫敗俗君爲逐之出境而詢問風俗表揚貞節禮敬士夫作新學校以端導民之路邑之審編舊必浹月旣竣而告者紛紜以爲常君裹糧躬歷諸郊隨民所聚以次審

之八日而畢民不費一錢無不懽然服其公者郡東
羅水所注每暴漲行旅阻絕君出橐中金辦材鳩工
旦暮往督之未兩月而石梁成詳見剏橋碑中大都
君視民如子稍有痛癢卽思爲爬搔之撫摩之視官
事如家事靡利弗興靡害弗除薄于爲身而勞于爲
民苦于厚下而儉于奉上蓋三載如一日聞以西語
循良者必舉君爲高第戊戌入計卽騎乘皆自其家
備之蕭然僕隸數人而已旣而謁君秩一等陝之藩
臬上人皆錯愕從役爲之號泣予詰君問故君曰吾
不能善事上官負罪實多大人長者時或見原獨恤

刑使者移檄治衣費可五十餘金吾妄意使者奉命恤民非以剝民也未有以應不意其不大人長者也今驟具在疏言于朝當與兩敗矣然寧人傷我吾無傷人吾實以拮据病困緣是得歸幸矣予聞而喜曰君心如是當有佳兒君既歸竟不能遣諸曾中意忽忽不樂疾遂作予聞遺書慰君曰君勿以功名鬱伊夫利澤及人之謂功悻聞長世之謂名此兩者君已得之于鳳民無庸介介也比書至而疾已篤至八月六日遂卒距其生嘉靖癸巳享年六十有六耳傷哉予聞君家食時渚泔大溢水沒城城不沒者數版饒

民皇皇無以爲計有婦人呼于市曰必王春元祭之時饒有兩王春元問主名指曰君也君聞殺牲爲文登城望祭祭畢而水落迄不爲災或以問故婦曰巢東斗星也翌日復問其婦情然不復憶矣人咸異之又君治鳳時秋禾正茂忽有蟲如蠶而微小色正黑緣苗食之徧四境皆然百姓奔告君祈君拯救君卽爲文率衆禱于神詰朝而蟲跡如掃竟亦莫知所往鳳士民爲圓頌之君嘗以治邑勞瘁成危病醫藥罔效夜夢梓潼神告之曰服補心丹乃愈覺以語醫醫言非對症藥已之旣復夢如前卽和而服之遂愈嗟

乎精能感神而不免惑于一婦誠至格昆蟲而不能
稱過使客豈非命耶君父文學舉嘉靖庚子鄉薦今
延津有惠政民至今尸祝之

教諭版奎傳

殷奎字孝章一字孝伯其先自華亭徙昆山少從楊
維禎授春秋嘗應鄉試不利遂謝去洪武四年以薦
赴京試高等例授州縣職因老母請近地便養忤意
調陝西咸陽教諭盡心教事在任四年念其母不置
鬱鬱而死年止四十有六門人私謚文懿先生奎文
章精審有法尤深於性理勤於纂述所著有道學統
緒國家祭儀崑山咸陽二志關中名勝集陝西圖經
等四書稿文離葉渭城寐語奎二子璧字孝連箕字
孝均俱明經篤于孝友奎卒璧間關數千里迎其柩

歸其舉秀才試廣西會事終太平府推官

訓導蕭先生岐行述

周是修

先生姓蕭氏諱岐字尚仁正固則其所類于齊而門人因以私謚也蕭氏世居郭西之柳溪里溯其先由六朝齊宗室曰叔誅襲封西昌侯食邑吉州泰和故家譜猶稱金陵蕭氏建隆中叔誅之十一世孫景純以明經仕至殿中侍御史弟景大之五世孫服補太學生七世孫森功書經中嘉定甲科以直言忤時相左遷衡山丞先生其六世孫也曾祖斯可字古山學行純正祖靜安字與道志節清曠治園亭池墅自娛父方平以書記死于文天祥厓山寨先生生泰定乙

五四歲而母亡五歲而父入廣零丁孤苦承祖靜安
公之訓幼穎悟恭謹自知讀書爲文誓不失先業甫
成童以書經有聲場屋既不偶於有司且知元季運
否又以祖父母衰老未能棄離卽退晦自守恂恂鄉
黨間敦睦典則稱於人人每醉歸袖手促步過市無
少怠容父老指以相語曰此君子人也翰林楊公吟
憲奇之以兄子妻焉比壯博通羣經尤長於四代之
書講貫洞徹識見廣遠如巨海長河浩浩蕩蕩莫獲
窺其涯涘四書習更精熟每臥誦以勉諸生終卷不
失一字士林推之性端重不喜諧謔嘗宴會豪士有

垂老者中席酣暢或舉杯相屬曰吾徒身後碑銘惟先生是托先生拒其酒正色曰須好爲人庶不關吾筆也一座爲之改容世變以來禮法廢弛間里宴集諸少往往誼譁恣肆動至速禍有識者多畏避不敢赴聞先生在則忻然相卽曰一簫先生足可鎮席矣先生待諸少不惡而嚴語稍不當惟正坐不應諸少入恃或隆冬而汗四方來學者誘掖論道不倦一言一行足爲儀表以故及門之士莫不涵養造就戶外之屨常滿而邑里後進薰其德而善良者亦不少也與人交無屑屑責備愈久而敬不衰事祖父母孝愛

客故家大族遇盛宴有珍味不一舉筋諸生承意輒
喜愧于家楊氏亦克恭婦職奉順唯謹脩物致養及
叙訓無所靳惜靜安公暮年失子而歲時盡歡年皆
九十而卒當承重之責歸厓山之骨雖亂離造次不
少忽於禮衰慕常如初喪焉楊氏以連年重憂成疾
而卒既而世遠更華柳溪之居蕩于兵燹長子忠被
虜於寇繼娶栗原羅氏亦詩禮名家距邑西北十五
里羅氏伯兄允道嘗偕赴鄉試力致先生於其里因
家焉國朝廓清大興文治旁求俊乂悉會京師於是
老師宿儒彬彬輩出先生語兄尚魯曰蕭氏一門唯

我與兄耳今諸幼皆未成立不可他圖也一往不復
則祖宗墳墓何所托乎語畢涕泣交下自是累舉不
就洪武壬戌春詔舉天下賢良共論治道有司強起
之先生以其子遵稍長足紹基緒且時之儉民告訐
蜂起動以逆誣奏乃幡然曰旣生爲丈夫子何可無
益於斯世哉殄行震驚吾不忍見也安民有詔吾將
應焉旣至京首陳十使書其略一曰審察誣告謀叛
者以便良善二曰禁止實封者以便人倫三曰免池
塘之稅以便耕種四曰早計檢秋糧以便會計水脚
五曰早行移折收以便民間預備六曰雜料隨土地

所宜以便價直七曰雜造不必團局拘監以便民自
爲八曰罪坐所由以便同寅九曰依律科斷以便當
罪十曰考覈生員以便學校書奏復懇陳民無寸鐵
之刃而授叛逆之名誠可痛也 上嘉納錫宴右角
門明且召入親授潭王府左長史先生以年老不欲
任頑剝辭至再四竟忤旨謫教雲南楚雄府受詔就
道明日 上念其忠言在耳而又憫其老也遣騎追
至乃還入見復得旨留京師朔望一入覲居歲餘一
夕夢神人引至一室有古書篋篋之類指示之且曰
生就此得歸家矣覺而異之是歲秋九月乃有陝

西平京府學訓導之命既至學舍則皆如夢中所見
因長嘆曰何莫非命也自是安於教授嚴條約以身
先之學者信服屯營守帥皆遣子從遊善誘所施率
就雅飭益其與人爲善本於至性故自大江以西經
生進士多出門下名播省憲當大比之歲聘幣交至
必以主文正考官爲請先生亦樂領之且曰掄材爲
國正吾儒者補報事也二十三年校文湖廣得舉人
六十四名二十六年校文福建得舉八五十四名二
十七年奉詔考定典籍始至賜宴奉天門趨朝賜食
十日入對屢獲稱旨宿食會同館往來翰林國子凡

四閔月學士劉先生三吾祭酒胡先生季安論義多
所推重已而得歸老之請宴餞奉天門賜衣被靴轎
給道里費比歸則傾竭行囊集士友營樂丘于近里
之沮山因語鄉黨曰吾且老矣若等宜守律處家勿
徇條例今上神聖聰斷動必加法不汝貸也樂丘
既成復自誌而銘之因寫真而自贊之曰吾以此見
祖宗於地下差不辱矣二十九年正月初度日親友
捧觴爲壽先生曰吾益衰矣今年又大比其能免於
考試之行乎三月浙江使者果至而先生以六月二
十二日戊申得廢疾自午及酉無一語及家事忽擲

水起坐曰吾其止於是乎言終脩然而逝享年七十
有二子二人忠字用文以被虜爲臨洮百戶何遇壻
消息不聞先生自平涼歸而用文適入覲邂逅道左
且哭且慶遂獲送南焉履險如夷君子莫不以先生
爲積善之報焉遵字用道篤於孝行治喪始末一依
文公家禮蓋率先生之庭訓也所著述累千百篇初
有正固彙在京有京華彙入平涼有歸來彙在湖廣
有鄂渚彙求墨跡者所至填塞常曰吾爲文不肯諛
人片言但移置別一人便用不去有五經四書要義
傳于家又嘗取刑統八韻賦引律理爲之解併爲一

集或問之曰二書本不可同日語先生胡爲合而繼之各曰天下之道本一而爲用則有二曰得與失而已出乎聖學必入乎刑統吾合二書將使觀者知所擇也凡其著述皆有關於世教一有不經輒能排擯斥不少許可海桑陳先生讀其文而序之曰先生養高龍門三箠間清修苦節種學績文不求聞達而亦未嘗不達殆古之不顯亦式者歟尤不信鬼神邪怪之事鄉鄰有疫癘無憚昏寐赴救之曰此人家均稟不正之氣故均得一証鬼安在耶當時學者望而愛之知先生不可奪之節仰而思之以先生有不可及

之德相與卽先生之名齊而私謚爲正固先生云嗚呼先生淵淵歷落以有其生辛勤來歸以底于道有文學以淑後進有德義以敦薄俗使論道安民之際得以在朝其所立豈不彰彰矣乎而卒不得遂其志豈非天哉然進言足以便民綸材足以爲國著述足以傳世敦善足以垂裕於先生又何憾乎況於易簣之頃正大光明得非知幾於天者耶

滙亭徐先生聰基志銘

李夢陽

先生姓徐氏郟城人也名聰字問博嘗亭滙上於是
稱滙亭先生先生力行篤學苦節清脩以廉孝聞春
母病思櫻非時無從得先生泣請而行彷徨叢薄間
得櫻以歸母食之愈人大異之稱徐孝子夫冬林之
笋冰溪之魚固非時者也精誠之至氣變以之故巢
幕之雀避舍之蛟君子不謂之怪也斯亦足以知天
矣今例第不以孝文則第孝子乃爲諸生攻文文文
又弗第也乃以貢爲醴泉縣學訓導云李子之西也
嘗往來奉天之墟是時訓導罷矣乃土人猶往往能

道訓導行事李子聞之則慨然而嘆曰吾不試故藝
向使渠非小試之安知不日其爲兀兀之腐夫訓導
之訓其徒也先行而後文制外以家內講肄以端其
習考覈以程其規標的以大其業宏博以遠其思抑
揚以處其志夏楚以鼓其氣久之士懔然若失也勃
而變已翁而從翻然而革訓導乃忻忻喜曰吾志其
行矣於是構齋植竹巖冠委裾講席成周孔之緒而
乾州學會官缺檄訓導往攝之久之而乾之徒猶其
徒也於是人始知訓導敬重之謂之才體泉饒錢參
政者出帑金千緡訓導賑之或問錢奚捨縣而任學

也錢曰人也孝廉孝則不忍人廉則不受金饑婦有
剝齒食者縣捕之將磔之市訓導見之則泣曰不能
使之不饑而能使之不斃乎非情也夫剝齒救斃耳
而今磔之是以斃易斃也令釋之人聞之愈敬重訓
導謂其才乃使攝其縣事縣以之治於是豪人懼歸
我侵田于學志行矣無何免去或咎之訓導直哂曰
予謂我兀兀腐夫邪其亭瀝上也年向衰矣猶聚徒
說先王顧益篤卽大寒暑罔輟也晚病目省延接矣
至遇經生學子則顧繾綣竟日李子曰予之南也嘗
度瀝矣於是又獲知瀝亭先生云而瀝上人蓋至今

解恭儉頌直篤行耽學必首先生先生生宣德乙卯
卒正德辛巳年八十七歲

焦太史編輯國朝獻徵錄卷之九十四終